



行素州堂金石叢書

103012

104
899

部 = 8





金石錄卷十五

槐廬叢書

宋東武趙明誠德父編著

吳縣朱記榮校刊

跋尾五

漢

漢孔子廟置卒史碑

漢東海相桓君海廟碑

漢孔君碣

漢韓明府孔子廟碑

漢吉成侯州輔碑

漢州輔碑陰

漢州輔墓石獸膊字

漢郎中鄭君碑

漢丹楊太守郭文碑

漢議郎元賓碑

漢孫叔敖碑陰

漢封邱令王元賞碑

漢王元賞碑陰

漢冀州刺史王純碑

漢王純碑陰

漢倉頡廟人名

漢成皋令任伯嗣碑

漢任伯嗣碑陰

漢平輿令薛君碑

漢泰山都尉孔宙碑

漢孔宙碑陰

漢西嶽華山廟碑

漢老子銘

漢荊州刺史度尙碑

漢孔子廟置卒史碑

右漢孔子廟置卒史碑其前有司徒吳雄司空趙戒奏

章歐陽文忠公具載於集古錄其後又有魯相奏記司

徒司空府文字尤爲完好云永興元年六月甲辰朔十

八日辛酉魯相平行長史事下守長擅叩頭死罪敢言

之司徒司空府壬寅詔書爲孔子廟置百石卒史一人
掌主禮器選年四十以上經通一藝雜試能奉宏先聖
之禮爲宗所歸者平叩頭死罪死罪謹按文書守文學
掾魯孔龢師孔憲戶曹史孔覽等雜試龢脩春秋嚴氏
經通高第事親至孝能奉先聖之禮爲宗所歸除龢補
名狀如牒平皇恐叩頭死罪死罪上司空府其詞彬彬
可喜故備錄之且以見漢時郡國奏記公府其體如此
也按華陽國志後漢書注皆云趙戒字志伯而此碑乃
作意伯疑其避桓帝諱故改焉

漢東海相桓君海廟碑

右漢東海相桓君海廟碑云惟永壽元年春正月有漢

東海相桓君又云熹平元年夏四月東海相山陽滿君
其餘文字完者尙多大畧記脩飾祠宇事而其銘詩有
云浩浩倉海百川之宗知其爲海廟碑也桓君與滿君
皆不具其名莫知其爲何人碑在今海州

漢孔君碣

右漢孔君碣在孔子墓林中其額題孔君之墓文已殘
闕其前云元年乙未而元年前上闕二字按東漢自建武
以後惟桓帝永壽元年歲次乙未其他有三乙未皆非
元年然則此碣所闕二字當爲永壽也

漢韓明府孔子廟碑

右漢韓明府孔子廟碑其略云君造立禮器樂之音符

鐘磬瑟鼓雷洗觴觚爵鹿相楹籩杞禁壹

秦壹當作壹
仲句切謝本

訛喜別本改作壺皆非是脩飭宅廟更造二輿所謂鹿者禮圖不載

莫知爲何器又據字書杞木皮可爲索壹陳樂也亦非

器名皆不可曉故并著其語以俟知者

余後見汝陽陳氏所藏古彝爲

伏鹿之形近歲青州獲一器亦全爲鹿形

疑所謂鹿者

因其形而名之耳案錢氏穀鈔本記其上云射禮有鹿

中高一尺五寸爲鹿形背設圓箛以納算籌射畢以釋

之器也又有之如屏風所以爲獲者御矢恐即杞也其

有木旁正猶俎

豆之爲榘榘也

漢吉成侯州輔碑

右漢吉成侯州輔碑名字已殘闕其題額云漢故中常

侍長樂太僕吉成侯州君之銘輔名姓見范曄後漢書

宦者傳以定策立桓帝與曹騰等七人同時封爲亭侯

今此碑載當時詔書有云其封輔爲吉成侯以此知其

名輔而酈道元注水經云雙縣滄水南有漢中常侍長

樂太僕吉成侯州苞冢冢前有碑其詞云六帝四后是

謬是誼今驗其銘文實有此語獨以輔爲苞蓋水經之

誤當取漢史及此碑爲正

漢州輔碑陰

右漢州輔碑陰京兆尹延篤叔堅而下題名者凡四十

餘人自東漢以後一時名卿賢大夫死而立碑則門生

故吏往往寓名其陰蓋欲附託以傳不朽爾今輔一宦

者而碑陰列名者數十人雖當代顯人如延叔堅亦預

焉有以見權勢之盛如此雖然區區挂名於此者亦可

恥也夫

漢州輔墓石獸膊字

右漢州輔墓石獸膊字酈道元注水經云州君墓有兩石獸已淪沒人有掘出一獸猶不全破甚高壯頭去地丈許製作甚工石膊上刻作辟邪字余初得州君墓碑又覽水經所載意此字猶存會故人董之明守官汝潁間因託訪求之逾年特以見寄其一辟邪道元所見也其一乃天祿字差大皆完好可喜之明又云天祿近歲為邨民所毀辟邪雖存然字畫已殘闕難辨此蓋十年前邑人所藏今不可復得矣

漢郎中鄭君碑

右漢郎中鄭君碑賈誼過秦論云九國之師遁巡而不敢進顏師古曰遁音千旬反流俗書本巡字誤作逃讀者因之而為遁逃之意潘岳西征賦云遁逃以奔竄斯亦誤矣今此碑有云推賢達善逡遁退讓詳其文義亦是逡巡之意案謝本義意二字互易然二字決非一音蓋古人用字與後世頗異又多假借故時有難曉處不知顏氏何所據遂音遁為逡乎

漢丹楊太守郭文碑

右漢丹楊太守郭文碑云君諱文字巨公有周之裔也又云治律小杜幼仕州郡舉孝廉除郎中謁者遷敬陵園令廷尉左平治書侍御史獄刑無頗憲臺如砥以父

憂去官還拜郎中侍御史遭母憂服除復拜郎中治書

侍御史遷冀州刺史徵拜尙書是時淮夷蠢迪案前漢書楊雄

傳云蠢迪檢押蠢迪猶言蠢動也盧疑迪作連非是帝疇官綏策書褒厲俾守丹

楊爲政四年以公事去官年過耳順寢疾瘳頽延熹元

年十月戊戌卒其十二月丙申葬微言絕矣諸子曷仰

卒載禮闕乃羣相與刻石勒銘最後云昔君卽世雖立

碑頌裁足載字加有瑕下闕君之弟故太尉薨歸葬舊

陵於是從子故五原太守鴻議郎某案此某字錢鈔及

嗣孫某名殘闕懷祖之德乃更刻石不改舊文蓋用昭明

祖勳焉郭氏爲陽翟著姓自躬以來世以通法律顯名

此碑所謂太尉公者禧也

漢議郎元賓碑

右漢議郎元賓碑在今亳州姓名已殘闕所可見者云

字元賓魯相之孫又云舉孝廉除倉龍司馬衛尉察尤

異遷吳令視事二稔民用甯康州辟從事公車徵拜議

郎年四十八延熹二年二月卒使者臨弔賻贈特加其

餘文字完好者尙多惜其名氏皆亾也

漢孫叔敖碑陰

右漢孫叔敖碑陰云延熹二年案金石文字記云三年與目錄正同此二年誤

書也中夏之節政在封表期思長光視事一紀訪問國中

耆年素聞孫君楚時良輔又云博采遺苗曾元孫子考

龜吉辰五月癸卯宜以存廢可立碑祀招請諸孫都會

國右郭西道北處所顯好興上宰祭倡優鼓舞又云相君有三嗣長子卽封食邑固始少子在江陵中子居三下一字又云相君卒後十有餘世有勃海太守其後歷敘子孫名字甚詳而文字斷續不可次第按期思長光碑陰不載姓氏叔敖碑雖有之然已殘闕矣案碑云先段君立石銘碑期思縣宰段光又爲刻石則姓氏尙可考漢時令長有在官一紀不遷者乃知前世官吏重於移易如此不惟吏民免送迎之擾而士人亦皆安於其職無僥倖苟進之心與後世異矣

漢封邱令王元賞碑

右漢封邱令王君碑其姓名已殘闕所可見者字元賞

而已云察舉孝廉郎謁者考工苑陵葉封邱令而銘文亦有撫臨三國之語歐陽公集古錄云爲苑陵丞者蓋誤以葉字爲丞爾案隸續云歐趙皆以爲王元賞予所得者卻是元賓字畫分明非是測度其名仿佛是紹

漢王元賞碑陰

右漢王元賞碑陰載門生姓名有云右奔喪右斬杖三年予嘗謂聖人之制禮爲可繼也無過與不及之弊務合於中庸而已禮曰事師無犯無隱服勤至死心喪三年孔子之喪門人疑所服子貢曰昔者夫子之喪顏淵若喪子而無服喪子路亦然請喪夫子若喪父而無服彼漢人爲王君乃斬衰之服於禮無乃過乎

漢冀州刺史王純碑

右漢冀州刺史王純碑延熹四年立桑欽水經云濟水北逕須句城西酈道元注濟水西有安民山山西有漢冀州刺史王紛碑漢中平四年立按地里書須胸卽今中都縣此碑在中都又其官與姓氏皆合疑其是也然以純爲紛以延熹爲中平則疑水經之誤

案顧氏藹吉云案碑文王

君以延熹四年卒五年始葬立碑此以爲四年立亦非也

漢王純碑陰

右漢王純碑陰其前題門生人名自東平馮定伯而下文字完好可識者百九十餘人摩滅不可識者又九十餘人字畫瀟勁可喜其後題義士名云各發聖心共出

義錢埤碑石直刊紀姓名埤當讀爲裨助之裨漢時墓碑多其門生故吏所立往往各紀姓名於碑陰或載所出錢數其非門生故吏而出錢者謂之義士今漢人爲王君出錢造碑而云各發聖心可謂陋矣

漢倉頡廟人名

右漢倉頡廟人名歐陽公集古錄云此碑有蓮勺左鄉有秩池陽左鄉有秩池陽集水有秩皆不知是何名號又有夏陽侯長殺翊侯長則是縣吏之名其字畫不甚精又無事實可考姑疑其名號以俟知者爾按前漢書張敞以鄉有秩補太守卒史後漢書百官志鄉置有秩三老游徼本注曰有秩郡所署秩百石掌一鄉人注引

漢官曰鄉戶五千則置有秩風俗通曰秩則田闢大夫言其官裁有秩爾然則有秩蓋亦鄉吏名也

漢成臯令任伯嗣碑

右漢成臯令任伯嗣碑其首已殘闕其可見者云字伯嗣南郡編人也其先蓋任座之苗胄又云舉孝廉除郎中蜀郡府丞江州令以服去官爲筑陽侯相延熹五年遷來臨縣其後歷敘政績又云遷居桂陽最後云都邑謠詠甄勒勳績永昭於後碑在今汜水縣汜水在漢爲成臯此碑蓋成臯令德政頌爾後漢書桓帝紀延熹八年有桂陽太守任允以此碑校之歲月相符又名與字協知其名允也

漢任伯嗣碑陰

右漢任伯嗣碑陰大觀初獲此碑寘於汜水輦運司廨舍壁間余聞其陰有字因託人諷邑官破壁出之遂得此本蓋漢碑有陰者十七八世多棄而不錄爾

漢平輿令薛君碑

右漢平輿令薛君碑文字完好云惟延熹六年春二月平輿令薛君卒烏虜哀哉吏民其咨咨君之德乃建碑石於墓之側其後有銘三百餘言敘述甚詳惟不載其名字世系故莫得而考焉

漢泰山都尉孔宙碑

右漢泰山都尉孔宙碑孔宙北海父也見後漢書融列

傳又據桓帝紀泰山都尉元壽元年置延熹八年罷宙
以延熹四年卒蓋卒後四年官遂廢矣案隸釋云宙以
延熹六年正月
卒碑以次
年七月立

漢孔宙碑陰

右漢孔宙碑陰門生有鉅鹿廣宗捕巡字升臺按氏族
書如姓苑姓纂皆無捕姓獨見於此碑爾

漢西嶽華山廟碑

右漢西嶽華山廟碑其略云孝武皇帝脩封禪之禮巡
省五嶽立宮其下宮曰集靈宮殿曰存仙殿門曰望仙
門歐陽公集古錄云所謂集靈宮者他書不見唯見於
此碑爾余按班固漢書地理志華陰有集靈宮武帝起
而酈道元注水經亦云敷水北逕集靈宮引地里志所
載其語皆同然則不獨見於此碑矣而所謂存仙殿望
仙門者諸書不載

漢老子銘

右漢老子銘舊傳蔡邕文并書蓋杜甫李潮小篆八分
歌有曰苦縣光和尚骨立書貴瘦硬方通神世云此碑
是也今驗其詞乃邊韶延熹八年作非光和中所立未
知甫所見是此碑否而本朝周越書苑遂以爲韶撰文
而邕書初無所據碑言孔子學禮時計其年紀聃已二
百餘歲聃然老旄之貌也而史記言謚曰聃按古謚法
無聃字又碑云孔子以周靈王二十年生今以年表及

世家考之孔子以魯襄公二十二年生實靈王二十一年未知孰是史書周太史儋事云孔子死後百二十九年徐廣注曰實一十九年今此碑所書正與史合不知徐廣何所據也

漢荊州刺史度尙碑

右漢度尙碑其首題曰漢故荊州刺史度侯之碑碑云其先出自顓頊與楚同姓熊下闕字之後又曰統國法度其下殘闕不可辨按元和姓纂度姓但云古掌度之官因以命氏不言其與楚同姓也又范曄後漢書列傳度尙自右校令擢爲荊州刺史破長沙零陵賊以功封右鄉侯遷桂陽太守徵還京師以中郎將破賊胡蘭等復

爲荊州刺史後爲遼東太守卒於官今以碑考之云封右鄉侯遷遼東太守拜中郎將復拜荊州刺史以故秩終蓋未嘗爲桂陽太守而曰卒於遼東者皆史之誤余每得前代名臣碑版以校史傳其官闕歲月少有同者以此知石刻爲可寶也

金石錄卷十五終

金石錄卷十六

槐廬叢書

宋東武趙明誠德父編著

吳縣朱記榮校刊

跋尾六

漢

漢車騎將軍馮緄碑

漢魯相晨謁孔子冢文

漢廣漢縣令王君神道

漢金鄉守長侯君碑

漢柳孝廉碑

漢衛尉卿衡方碑

漢沛相楊君碑

漢涪于長夏承碑

漢郎中馬君碑

漢武都太守李翁碑

漢博陵太守孔彪碑

漢成陽靈臺碑

漢廷尉仲定碑

漢故民吳公碑

漢司隸校尉魯峻碑

漢桂陽太守周府君碑

漢周府君碑陰

漢石經遺字

漢堂谿典嵩高山石闕銘

漢帝堯碑

漢倉頡廟碑

漢斥彭長斷碑

漢車騎將軍馮緄碑

右漢車騎將軍馮緄碑以范氏後漢書考之史云字鴻卿而碑云皇卿史云初舉孝廉七遷至廣漢屬國都尉拜御史中丞順帝末持節揚州諸軍事與中郎將滕撫擊破羣賊今據碑自舉孝廉至為廣漢屬國都尉凡十一遷而為中丞與督使徐揚二州討賊皆在為都尉前碑云討賊時坐迫州縣正法而史不載又云為隴西太

守坐問吏辜旬不分去官以羌駭動爲四府所表復家
拜隴西太守而史但言遷隴西太守爾史云爲遼東太
守徵拜京兆尹轉司隸校尉遷廷尉太常拜車騎將軍
以碑考之緄爲遼東太守以前嘗復爲治書侍御史遷
尙書遂爲廷尉未嘗拜京兆尹及司隸也史云振旅還
京師監軍使者張敞承宦者旨奏緄會長沙賊復起攻
桂陽武陵緄以軍還盜賊復發策免而碑云臨當受封
以謠言奏河內太守中常侍左悺弟坐遜位史云復拜
廷尉時山陽太守單遷以罪繫獄緄考致其死遷故車
騎將軍超之弟中官相黨遂共誹章誣緄坐輸左校而
碑云表荊州刺史李隗南陽太守成晉晉漢史作增太原太

守劉瓛不宜以重論坐正法作左校亦皆不合史又云

爲河南尹時上言舊典中官子弟不得爲牧人職帝不

納拜屯騎校尉

案別本作屯騎將軍何氏焯從隸釋定

無屯騎也驃騎車騎位次公下亦不復爲廷尉卒於官

而碑云復廷尉奏中官子弟不宜典牧州郡獲過左右

遜位永康元年薨亦當以碑爲正碑又云緄諡曰桓而

史亦不載予嘗謂石刻當時所書其名字官爵不應差

誤可信無疑至於善惡大節則當以史氏爲據今此傳

首尾顛倒錯繆如此然則史之所載是非褒貶失其實

者多矣果可盡信邪

漢魯相晨謁孔子冢文

右漢魯相晨謁孔子冢文已斷裂闕其上一段其略可見者云建甯元年三月十八日丙申晨又云其四月十一日戊子到官謁孔子冢其他文字雖完皆不可次第魯相晨有兩碑皆在孔子廟中其一碑云臣蒙恩受任符守得在奎婁周孔舊寓又云臣以建甯元年到官其一碑云魯相河南史君諱晨字伯時從越騎校尉拜以建甯元年四月十一日戊子到官然則斯碑所載名晨者蓋魯相史晨也

漢廣漢縣令王君神道

右漢廣漢縣令王君神道建甯元年十月造縣令字作荅漢人滄質文字相近者多假借用之如縣令字人所

常用而尙假借何耶

案此縣竹令也隸釋云微雜篆體縣字作曰下木畧與縣字相混故

趙氏誤作廣漢縣令而謂其借荅爲令也又此本無年月趙氏誤合劉讓閣道題字爲一碑故以爲建甯元年造

漢金鄉守長侯君碑

右漢金鄉守長侯君碑載其上世云漢與侯公納策濟太上皇於鴻溝之阨諡曰安國君曾孫酺封明統侯光武中興元孫霸爲臨淮太守擁兵從光武平定天下轉拜執法刺姦五威司命大司徒公封於陵侯歐陽公集古錄云執法左右刺姦五威司命皆王莽時官侯霸列傳云霸莽時爲隨宰遷執法刺姦而未嘗爲五威司命後代伏湛爲大司徒封關內侯旣薨光武下詔追封則

鄉侯而此碑言封於陵侯未知孰是據碑言刺姦司命
爲光武時官蓋碑之謬余按霸列傳霸薨追封則鄉侯
至子昱改封於陵而遂以霸爲於陵侯疑亦碑之誤又
按高祖紀侯公說項羽歸太公呂后乃封侯公爲平國
君今此碑言安國旣不同而平國君乃生時稱號如婁
敬爲奉春君之類碑以爲謚恐亦非是又酺封明統侯
漢書功臣表亦不載不知碑何所據也

漢柳孝廉碑

右漢柳孝廉碑云君諱敏其先蓋五行星下闕一字二十八
舍柳宿之精也其說亦可謂怪矣自戰國以來聖人不
作諸子百家異端怪說紛然而起其弊至東漢而極焉

自非豪傑之士卓然不爲流俗所移未有不從而惑者
也若此碑直以柳君得姓出於柳宿果何所據哉

漢衛尉卿衡方碑

右漢衛尉卿衡方碑有云感昔人之凱風悼蓼儀之劬
勞以蓼莪爲蓼儀他漢碑多如此蓋漢人各以其學名
家故所傳時有異同也

漢沛相楊君碑

右漢沛相楊君碑歐陽公集古錄云碑首尾不完失其
名字余按楊震碑沛相名統震長子富波侯相牧子也

漢涪于長夏承碑

右漢涪于長夏承碑云君諱承字仲充東萊府君之孫

太尉掾之中子中郎將弟也

案中郎將上隸釋有右字

累葉牧守印

綬典據十有餘人皆德任其位名豐其爵是故寵祿傳於歷世策勳著於王室君鍾其美受性淵懿舍和履仁治詩尚書兼覽羣藝靡不尋暢州郡更請屈己匡君為主簿督郵五官掾功曹上計掾守令冀州從事又云察孝不行太傅胡公歆其德美旌招俯就羔羊在公四府歸高除瀆于長又云年五十有六建甯三年六月癸巳淹疾卒官碑在今潞州元祐間因治河隄得於土壤中建甯靈帝時年號也距今千歲矣而刻畫完好如新余家所藏漢碑二百餘卷獨此碑最完

漢郎中馬君碑

右漢郎中馬君碑文字殘缺所可見者字元海而已

案隸

釋云

又云其先賜號馬服因遂氏焉又云以和平元年

舉孝廉除郎中謙虛接下冠名三署

案舊作三省葉本從隸釋作署

云年四十元嘉三年正月卒又云夫人年五十五建甯

三年十二月卒其他不可考究矣

漢武都太守李翁碑

漢時文字多與今隸書不合皆依石本錄之

右漢武都太守李翁碑文字首尾完好云漢故武都太

守漢陽阿陽李君諱翁字伯都其後歷敘在郡治蹟云

郡西狹中道危難阻峻緣厓俾閣兩山壁立隆崇造雲

下有不測之谿阨窄促迫財容車騎進不能濟息不得

駐數有顛覆隕隧之害君勅衡官有秩李瑾掾仇審因

常繇道徒鑿燒破析刻召崔嵬滅高就埤桺致土石堅
固廣大可以夜涉四方無雍行人懽懽民歌德惠穆如
春風乃刊斯石其後有頌詩最後題建甯四年六月十
三日壬寅造云

漢博陵太守孔彪碑

右漢博陵太守孔彪碑歐陽公集古錄云孔君碑者其
名字摩滅不可見而世次官閥粗可考云孔子十九代
孫潁川君之元子也舉孝廉除郎中博昌長拜尚書侍
郎治書侍御史博陵太守遷下邳相河東太守建甯四
年十月卒其終始略可見惟其名字皆亾爲可惜也今
此碑雖殘闕而名字尙完可識云君諱彪字元上又韓

府君孔子廟碑陰載當時出錢人名亦有尙書侍郎孔
彪元上與此書正同惟孔君自博陵再遷爲河東太守
而碑額題故博陵太守孔府君碑漢人多如此然莫曉
其何謂也

案隸釋云蓋博陵
之人相與立碑耳

漢成陽靈臺碑

右漢成陽靈臺碑成陽屬今雷澤碑略云堯母慶都仙
歿蓋葬於茲欲人不知名曰靈臺歐陽公集古錄以謂
自史記地志及水經諸書皆無堯母葬處余按班固西
漢劉昭東漢地理志皆云成陽有堯冢靈臺而東漢志
章帝元和二年東巡守將至泰山道使使者奉一太牢
祠帝堯於濟陰成陽靈臺與章帝紀所載正同帝紀章

懷太子注引郭緣生述征記云成陽縣東南有堯母慶都墓上有祠廟堯母陵俗亦名靈臺文母水經注今成陽城西二里有堯陵陵南一里有堯母慶都陵於城爲西南稱曰靈臺蓋兩漢史所載似以靈臺爲堯冢惟此碑與述征記水經乃直指爲堯母冢爾然水經云在成陽西南而述征記云在東南未知孰是又集古錄云諸書俗本多作城陽獨此碑爲成陽當以碑爲正余嘗考之成陽縣名屬濟陰郡城陽乃王國名漢文帝二年以封齊悼惠王子章者漢志所載各異未嘗差誤也碑有廷尉某歐陽公以爲姓名摩滅不可讀今驗其缺處姓下隱隱有定字知其名定而其後云濟陰太守審晃成

陽令管遵各遣大掾輔助仲君知其姓仲仲氏世爲成陽人定有墓在雷澤碑尙存其額題漢故廷尉仲君碑有云表祠唐堯爲漢祈福又云爲廷尉卿託病乞歸脩堯靈臺黃屋三十餘上聽拜太中大夫云

余爲淄州同官李堯雷澤

人云冢正在城西南蓋述征記誤也

漢廷尉仲定碑

右漢廷尉仲定碑在今濮州雷澤其額題漢故廷尉仲君之碑碑載官闕甚詳雖殘闕然尙可次第其略云君諱定聖漢龍興家於成陽父張掖廣漢太守以父勳拜琅邪太守南陽陰府君察孝不行南郡胡公除濟陰復舉孝廉拜尙書左丞除郎中遷彭城呂長微試博士太

傳下邳趙公舉君高行遷豫州刺史將軍從事遷符節
令豫章太守徵議郎拜大尙書遜位復徵拜將軍長史
遷城門校尉執金吾拜太中大夫遷廷尉卿託病乞歸
脩堯靈臺黃屋三十餘上聽拜太中大夫臺成事訖上
以君先帝舊臣策令州郡以禮特遣熹平元年孟秋上
旬君遘疾不瘳於是門生養徒故吏鄉黨刊石勒銘樹
碑表道焉兩漢遷拜次第史旣不能詳載而石刻類皆
摩滅難考今此碑所載詳悉故盡著之所謂南郡胡公
者廣也太傅下邳趙公者峻也按定漢史無傳惟風俗
通元和姓纂具載姓名官爵云

漢故民吳公碑

右漢吳公碑其額題漢故民吳公之碑碑云熹平元年
十二月上旬吳公仲山其他刻畫完好如新文辭頗拙
陋書亦怪而不工然漢時石刻存者漸少而此碑特完
故錄之以資博覽

漢司隸校尉魯峻碑

右漢司隸校尉魯峻碑云君諱峻字仲嚴酈道元注水
經引戴延之西征記曰焦氏山北金鄉山有漢司隸校
尉魯恭冢冢前有石祠四壁皆青石隱起自書契以來
忠臣孝子貞婦孔子及七十二弟子形像像邊皆刻石
記之今墓與石室尙存惟此碑爲人輦置任城縣學矣
余嘗得石室所刻畫像與延之所記合又其他地里書

如方輿志寰宇記之類皆作峻惟水經誤轉寫爲恭爾
案顧氏藹吉云水經注所載乃石壁畫像非此碑也

漢桂陽太守周府君頌

右漢桂陽太守周府君頌歐陽公集古錄云府君字君光而名已諱闕不可辨圖經但云周府君而不著其名後漢書又無傳遂不知爲何人而曾子固言嘗得此碑於知韶州王之才之才以書來言曲江縣圖經周府君名昕字君光則永叔云圖經不載其名者蓋考之未詳也今此本雖諱闕然究其點畫殊不類昕字二公所說既不同而韶州圖經余家偶無有皆未可知也當考之

予後見市中印本歐陽公廬陵集別有一跋尾云周君名憬憬字頗近之

漢周府君碑陰

右漢周府君碑陰題名凡三十一人姓氏具存按酈道元注水經瀧水南逕曲江縣東縣昔號曲紅曲紅山名也而東西兩漢史皆作曲江今據此碑自縣長區祉而下凡十七人皆書爲曲紅則是當時縣名曲紅無可疑者不知兩漢史皆作曲江何也

漢石經遺字

右漢石經遺字者藏洛陽及長安人家蓋靈帝熹平四年所立其字則蔡邕小字八分書也其後屢經遷徙故散落不存今所有者才數千字皆土壤埋沒之餘摩滅而僅存者爾按後漢書儒林傳敘云爲古文篆隸三體

者非也蓋邕所書乃八分而三體石經乃魏時所建也
又按靈帝紀言詔諸儒正五經文字刻石立於太學門
外蔡邕傳乃云奏求正定六經文字既已不同而章懷
太子注引洛陽記所載有尙書周易公羊傳論語禮記
今余所藏遺字有尙書公羊傳論語又有詩儀禮然則
當時所立又不止六經矣洛陽記又云禮記碑上有諫
議大夫馬日磾議郎蔡邕等名今論語公羊後亦有堂
谿典馬日磾等姓名尙在據邕傳邕以經籍去聖久遠
文字多繆俗儒穿鑿疑誤後學乃奏求正定自書於碑
於是後儒晚學咸取正焉今石本既已摩滅而歲久轉
寫日就譌舛以世所傳經書本校此遺字其不同者已
數百言又篇第亦時有小異使完本具存則其異同可
勝數耶然則豈不可惜也哉而後世學者於去古數千
百歲之後盡紕前代諸儒之論欲以己之私意悉通其
說難矣余既錄爲三卷又取其文字不同者具列於卷
末云

漢堂谿典嵩高山石闕銘

右漢堂谿典嵩高山石闕銘云中郎將堂谿典伯并熹
平四年來請雨嵩高廟按後漢書靈帝紀熹平五年復
崇高山名爲嵩高山章懷太子注引前漢書武帝祀中
嶽改嵩高爲崇高東觀記曰使中郎將堂谿典請雨因
上言改崇高復爲嵩高今此銘乃熹平四年可以正漢

史之誤又蔡邕傳注引先賢行狀云典字子度而延篤傳注又作季度今此碑乃云字伯并亦當以碑爲正

漢帝堯碑

右漢帝堯碑云帝堯者昔世之聖王也其先出自塊隗翼火之精有神龍首出於常羊又云名紀見乎河雒爰嗣入九慶都與赤龍交而生伊堯又云侯伯遊於元河之上龍龜負銜投鈐受與然後堯乃受命其說出於讖緯可謂怪妄不經矣堯之所以爲聖者豈假此而已哉

漢倉頡廟

右漢倉頡廟碑文字殘闕其畧可辨者有云倉頡天生德於大聖四目靈光爲百王作憲而其銘曰穆穆聖倉知其爲倉頡碑也考其歲月蓋熹平六年立

漢斥彰長斷碑

右漢斥彰長斷碑在華陰已斷裂惟存下一段故其姓名皆亾矣所可見者有云先高祖時以吏二千石自齊臨淄徙充關中祖字興先爲執金吾弟颺漁陽太守又云元初元年遭家不造三歲喪父事母有柴穎之行初仕爲縣主簿功曹郡諸曹史帳下司馬劉君招命署議曹掾假除百石遷補任尉假印綬守廣平下曲陽令斥彰長熹平二年秋七月寢疾不豫最後題熹平六年十月九日辛酉造按史記及漢書本紀高祖九年徙齊楚大族昭屈景懷田五姓關中而其四姓皆楚人自齊徙

者惟田氏爾然則此碑所謂高祖時自齊臨淄徙者其人必姓田氏也
按第五氏亦云自齊徙關中然本亦出於田氏也 斥彰東西漢史皆作斥章

金石錄卷十六終

金石錄卷十七

槐廬叢書

宋東武趙明誠德父編著

吳縣朱記榮校刊

跋尾七

漢

漢梁相費汎碑

漢堂邑令費君碑

漢費君碑陰

漢太尉陳球碑

漢華嶽碑

漢太尉郭禧碑

漢郭禧碑陰

漢郭禧後碑

漢樊毅西嶽碑

漢禹廟碑

漢冀州從事郭君碑

漢逢童子碑

漢逢童子碑陰

漢三公碑

漢殺阬君神祠碑

漢殺阬君神祠碑陰

漢無極山碑

漢揚州刺史敬使君碑

漢橐長蔡湛頌

漢蔡湛碑陰

漢安平相孫根碑

漢涼州刺史魏君碑

漢碭孔君神祠碑

漢梁相費汎碑

右漢梁相諱汎碑在湖州其額題漢故梁相費君之碑

碑云梁相諱汎字仲慮此邦之人也其先季文爲魯大

夫有功封費因姬爲姓案姓別本作以秦項兵起避地於此遂

畱家焉余家所收姓氏文字麤備以諸書參考頗多抵

牾不合姓苑云費氏禹後漢有長房蜀志有承相禕又

云今琅邪亦有此姓音父位反李利涉編古命氏云費氏出自魯桓公少子季友有勳於社稷賜汶陽之田封邑於費子孫氏焉漢有費將軍其後有費忠費柔柔適蜀爲甯蜀大忠之孫徙於荊州後遷江夏忠十代孫奕奕孫禕又家於蜀晉平蜀禕之子承復歸江夏林寶元和姓纂云費氏亦音祕史記紂幸臣費中夏禹之後楚有無極漢有直蜀有禕晉有詩又云琅邪費氏直之後也陳湘姓林云費氏音蜚夏禹之後余嘗考之此字有兩姓音讀不同源流亦異其一音蜚嬴姓出於伯翳史記所載費昌費中楚費無極漢費將軍費直費長房蜀費禕之徒是其後也其一音祕姬姓出於魯季友姓苑

所載琅邪費氏而此碑所謂梁相費君是其後也然則姓苑姓纂姓林皆云夏禹之後姓纂又云亦音祕及謂琅邪費氏爲直之後皆其差誤而編古命氏以費將軍費禕之徒出於魯季友亦非也余又按春秋僖公賜季友汶陽之田及費而左傳亦以謂季友有功於魯受費以爲上卿今以爲季文有功封費者蓋碑之誤

漢堂邑令費君碑

右漢堂邑令費君碑云惟熹平六年無射之月堂邑令費君寢疾卒嗚呼哀哉於是夫人元弟卜肩追而誄之其後有銘詩碑所述費君事不甚詳悉而其名字世次官秩具載於碑陰今附於後

漢費君碑陰

右漢費君碑陰云君諱鳳字伯蕭梁相之元子九江太守之長兄也世德襲爵銀艾相亞又云君踐郡右職三貢獻計漢安二年吳郡太守東海郭君以君有委蛇之節自公之操年三十一舉孝廉拜郎中除陳國新平長遂宰堂邑其後爲五字韻語詞頗古雅而時時殘闕不可次序其前題君舊家中孫甘陵石勛字之才所述云

案何氏焯云勛葉本作勛蓋勛字爾隸釋作勛亦誤顧氏藹吉云疑是勛字之誤

漢太尉陳球碑

右漢太尉陳球碑球有兩碑皆在下邳其一已殘闕此碑差完可考前代碑碣與史傳多抵牾而球碑所載官闕事跡與傳合東漢之末政在閭寺威福下移其勢蓋可畏也而一時眾君子猶奮不顧身力排其姦雖遭屠戮而不悔志雖不就然亦可謂壯哉如球是已使當時士大夫能屈己以事之則富貴可長保矣然君子固未肯以彼而易此也

漢華嶽碑

右漢華嶽碑集古錄云碑以周禮職方氏爲識方氏者疑當時周禮之學自如此蓋職誌其義通也余按袁逢華嶽碑亦引職方氏乃用識字蓋漢人簡質字相近者輒假借用之初無意義爾

漢太尉郭禧碑

右漢太尉郭禧碑文字殘闕所存才百許字其可見者
公諱禧字君房而已禧郭躬從孫也其事跡附見躬列
傳云少明習家業兼好儒學有名譽延熹中爲廷尉建
甯二年代劉寵爲太尉而靈帝紀亦云是年十一月禧
爲太尉章懷太子注云字公房扶溝人也郭氏世爲陽
翟人自躬以下皆葬陽翟其墓尙在今此碑闕處猶有
陳畱扶溝字疑禧嘗寓居是邑其卒也返葬故鄉而漢
書注遂以爲扶溝人恐誤

漢郭禧碑陰

右漢郭禧碑陰其首有四大字云故吏人名其下列故
吏密張立度成匱師張協子道雒陽李蒼子考故民河
南陰德紀信以下凡百餘人又有右河南右河內郡右
宏農郡右扶風郡字畫完好者甚多筆法渾古可愛

漢郭禧後碑

右漢郭禧後碑殘闕尤甚其略可辨者云惟光和二年
夏五月甲寅太中大夫故太尉郭公薨又云公之肩子
故五原太守餘不復成文而其額題漢故太尉郭公神
道字畫尙完云後漢書列傳既不載禧所終而靈帝紀
但云建甯三年夏四月太尉郭禧罷亦不言其爲何官
今以碑考之乃知其罷爲太中大夫而卒於光和二年
也五原太守名鴻後爲司隸校尉封成安鄉侯

漢樊毅西嶽碑

右漢樊毅西嶽廟碑云宏農太守河南樊君諱毅歐陽文忠公集古錄云據此碑乃卽時所立而太守生稱諱者何哉按春秋左氏傳周人以諱事神名終將諱之而禮卒哭乃諱鄭氏以謂敬鬼神之名也諱避也生者不相避名衛侯名惡大夫有石惡君臣同名春秋不非又漢宣帝元康二年詔曰聞古天子之名難知而易諱也今上書觸諱以犯罪者朕甚憐之其更諱詢諸觸諱在令前者赦之蓋卒哭而諱其名實始於周而生死皆稱諱西漢已如此矣然則生曰名死曰諱又出於近世也有以見後世忌諱愈密如此然生而稱諱見於石刻者甚眾不獨此碑也

漢禹廟碑

右漢禹廟碑云光和二年十二月丙子朔十九日甲午皮氏長南陽章陵劉尋孝嗣永安定烏氏樊璋元孫其後敘禹平水土之功而最後有銘文多殘闕不能盡識碑在龍門禹廟

漢冀州從事郭君碑

右漢郭君碑名字已殘闕其額題曰冀州從事郭君之碑碑云其先出高辛興自於周

闕一字

蕃虞郭在河魏之

閒遭晉荒疆乃喪厥土奕世孳孳職思其勳子孫纓布家於樂土因國爲氏又云歷郡諸曹掾史主簿督郵五官掾功曹又云光和二三年終三年十月葬又云哀哀考

妣追惟實靈卜商號咷喪子失明據此乃父母生而稱考妣也爾雅云父爲考母爲妣郭璞注引禮記生曰父母妻死曰考妣嬪今世學者從之而璞援據諸書以爲非生死之異稱猶今謂兄爲舅妹爲媯爾今此碑漢人所爲已不用戴氏之說以此知璞爲有據然禮經行於世久既有此論事親者所當避也

漢逢童子碑

右漢逢童子碑刻畫完好云童子諱盛字伯彌薄令之元孫遂成君之曾孫安平君之孫五官掾之長子也又云年十有二歲在協洽五月乙巳噓吸不反天隕精龜於是門生東武孫理下密王升等共刊石敘述才美以

銘不朽焉其後題光和四年四月五日丁卯立碑舊在濰州昌邑縣近歲移置郡中云

漢逢童子碑陰

右漢逢童子碑陰題云右家門生右縣中士大夫凡十三人有督郵璉敏賓璉后升司文叔盛姓字桉璉司文姓氏書皆不載今誌於此

漢三公碑

右漢三公碑歐陽公集古錄有北嶽碑云文字殘闕尤甚其可見者曰光和四年以此知爲漢碑爾其文多言珪幣牲酒黍稷豐穰等事其後二人姓名偶可見云南陽冠軍馮巡字季祖甘陵夏方字伯陽余嘗託人於北

嶽訪求前代刻石幾盡獨無漢碑今此碑所書事及二人姓名與集古所載皆同又光和四年立惟其額題曰三公之碑而集古以爲北嶽碑豈歐陽公未嘗見其額乎三公者山名其事亦載於白石神君與無極山碑三山皆在眞定元氏云

漢穀阮君神祠碑

右漢穀阮君神祠碑歐陽公集古錄云穀阮君祠今謂之五部神廟其像有石隄西成樹谷五樓先生東臺御史王翦將軍莫曉其義今此碑有云石隄樹谷南通商雒又云前世通利吏民興貴有御史大夫將軍牧伯故爲立祠以報其功乃知石隄樹谷御史將軍之號自漢

以來有之流俗相傳其所從來遠矣而水經鄭縣城南山北有五部神廟前有碑光和四年鄭縣令河東裴畢字君先立又知五部神自齊魏間已有此號矣裴君水經以爲名畢而集古錄云名華今詳其點畫頗近畢字疑集古錄誤

漢穀阮君神祠碑陰

右漢穀阮君神祠碑陰吏及鄉人題名縣其完好可識者二百餘人摩滅者又百餘人小字滄勁可喜歐陽公集古錄所未嘗有也

漢無極山碑

右漢無極山碑按顏之推家訓曰詩云有渰萋萋興雲

祁祁毛傳云滄陰雲貌萋萋雲行貌祁祁徐也箋云古者陰陽和風雨時其來祁祁然不暴疾也按滄已是陰雲何勞復云興雲祁祁邪雲當爲雨俗寫誤爾班固靈臺詩云習習祥風祁祁甘雨此其證也據此則本作雲字之推改爲雨耳而陸德明經典釋文亦云本作興雲非也蓋德明據顏氏說改之故後來本皆作雨今此碑銘文有云興雲祁祁雨我公田遂及我私乃知漢以前本皆作興雲顏氏說初無據特私意耳

案漢書食貨志作興雲祁祁與韓詩外傳及呂氏春秋務本篇所引皆同唯後漢左雄傳作興雨李善注班固靈臺詩引毛詩曰興雨祁祁然則作興雲者韓詩也興雨者毛詩也固不可謂其無據又祁祁今詩作祈祈舊本並不爾當是誤刻

漢揚州刺史敬使君碑

右漢敬使君碑在河東平陽其額題云漢揚州刺史敬君之銘碑已殘闕其名字皆亾畧可辨者嘗辟司隸從事又爲治書御史最後云年五十三光和四年閏月遭疾而卒其他不復可考按姓苑載風俗通有敬歆漢末爲揚州刺史元和姓纂亦云歆平陽人而後周書敬珍傳唐書宰相世系表歆皆作韶余後得後魏敬曦造像碑亦作韶乃知姓苑姓纂之謬又集古錄此碑凡再出其一題敬仲碑云名字已摩滅獨首有敬仲字故寓其名爾疑其人姓田也其一題無名碑所載事皆同蓋歐陽公未嘗見其額爾

漢臺長蔡湛頌

右漢橐長蔡湛頌云君諱湛字子德河內脩武人也又云舉孝廉辭讓應司徒府除廣川長復辟太尉熹平四年六月詔書其下斷闕似是敘述遷橐長及在官政績又云三年遷高邑令吏民追思於是故吏栗尹等相與合會立碑起頌刊斯石焉其後有銘最後題光和四年十二月詔書遷并州刺史其大畧如此其他文字殘闕不可考矣

漢蔡湛碑陰

右漢蔡湛碑陰載出錢人名有故吏賤民議民故三老故處士義民其稱故吏義民之類他漢碑多有之惟議民賤民獨見於此碑然莫詳其義

漢安平相孫根碑

右漢安平相孫根碑云府君諱根字元石司空公之伯子樂安太守之兄子漢陽太守侍御史之兄乘氏令之考厥先出自有殷元商之系子湯之苗又云聖武定周封比干之墓脩裔分析避地匿軌姓曰孫焉又云遷鄆長雍奴令換元氏考城令諫議大夫拜議郎謁者遷荆州刺史徵拜議郎遷安平相年七十有一光和四年十二月乙巳卒碑在今高密縣所謂司空公者桓帝紀永壽三年太常孫朗爲司空注云朗字代平北海人漢三公名亦云朗北海高密人余嘗觀漢時碑碣載其家世皆止書官爵蓋爲子孫作銘不欲名其父祖爾此最爲

得體然非當代顯人則遂莫知其爲何人也又按姓苑
姓纂諸書皆云孫氏周文王子衛康叔之後衛武公子
耳爲衛上卿因氏焉今此碑乃云出於商比干之後蓋
古人或因賜姓命氏或以官或以諡或以封或以居或
以王父字爲氏故姓氏雖同而源流或異書傳闕漏不
載者多矣


漢涼州刺史魏君碑

右漢涼州刺史魏君碑文字殘闕族系名字皆不可考
其粗可見者察孝廉除郎中尙書侍郎右丞卒於光和
四年而其額題涼州刺史魏君碑云

案隸釋云碑有
其字曰元丕

漢碭孔君神祠碑

右漢碭孔君神祠碑其前題漢故行梁相事碭孔君之
神祠文詞字畫皆古怪而不工又時有難曉處然刻畫
甚完孔君者名耽字伯本



金石錄卷十七終

金石錄卷十八

槐廬叢書

宋東武趙明誠德父編著

吳縣朱記榮校刊

跋尾八

漢

漢成陽令唐君頌

漢唐君碑陰

漢白石神君碑

漢幽州刺史朱龜碑

漢朱龜碑陰

漢都鄉正街彈碑

漢太尉劉寬碑

漢劉寬碑陰

漢尉氏令鄭君碑

漢趙相劉衡碑

漢陳君碑

漢陳仲弓碑

漢陳仲弓碑陰

漢陳仲弓壇碑

漢圉令趙君碑

漢周公禮殿記

漢巴郡太守樊君碑

漢綏民校尉熊君碑

漢宗資墓天祿辟邪字

漢司空宗俱碑

漢馮使君墓闕銘

漢高陽令楊君碑陰

漢浚儀令衡立碑

漢光祿勳劉曜碑

漢成陽令唐君頌

右漢成陽令唐君頌云君諱扶字正南字畫尙完而歐陽公集古錄乃云其名殘缺何哉碑額題漢故成陽令唐君之頌在今濮州雷澤縣古成陽也

漢唐君碑陰

右漢唐君碑陰載出錢造碑人有故從事故督郵故吏處士門生門童等姓名按唐君碑云處士間蔡班等刻石樹頌而碑陰又有故吏間蔡巴處士間蔡楚間蔡姓不見於前史而姓苑姓纂之類亦皆不載蓋前代氏族或因改易或浸微不顯遂泯沒而無傳者甚眾今世所有姓氏書類多簡畧不完惟時時見於石刻者余每記之以裨姓氏書之闕云

漢白石神君碑

右漢白石神君碑其畧云白石神君者居九山之數參三條之一兼將軍之號秉斧鉞之威體連封龍氣通化岳幽讚天地長育萬物觸石而起膚寸而合不終朝日而澍雨沾洽自前後國縣屢有祈請指日刻期應時有驗猶自挹損不求禮秩縣界有六名山三公封龍靈山得法食去光和四年三公守民蓋公等始爲無極山詣太常求法食相縣以白石神君道德灼然乃具載本末上尙書求依無極卽蒙聽許于是遂開拓舊兆改立殿堂其餘首尾尙皆完好可讀文多不備載其曰居九山之數參三條之一莫曉爲何語也

九山三條見尙書注疏

漢幽州刺史朱龜碑

右漢幽州刺史朱龜碑在今亳州酈道元注水經云渦水東逕朱龜墓北東南流冢南枕道有碑題云漢故幽州刺史朱君之碑龜字伯靈光和六年卒官今以碑考

之與道元所載皆合歐陽公集古錄云龜之事跡不見
史傳獨見于此碑爾余按後漢書西南夷傳熹平五年
諸夷反叛執蜀郡太守雍陟遣御史中丞朱龜討之不
能克太尉掾李暉建策討伐乃以暉爲益州太守發板
楯蠻擊破平之常璩華陽國志亦載其事與史同惟史
與華陽國志皆言龜不能克而碑云蠻夷授首乞降二
說不同疑碑所書非實錄也

漢朱龜碑陰

右漢朱龜碑陰文字殘闕初余讀酈道元注水經云朱
龜碑陰故吏姓名多上谷代郡人知此碑有陰因託人
就亳社模得之附於碑後

漢都鄉正街彈碑

右漢都鄉正街彈碑在汝州界故昆陽城中文字摩滅
不可考究其歲月畧可見蓋中平二年正月而其額題
都鄉正街彈碑莫知其爲何碑也

案街彈之義見周禮里宰注

漢太尉劉寬碑

右漢太尉劉寬碑寬有兩碑皆在洛陽上東門外官道
傍此碑據藝文類聚乃桓麟撰後碑不知何人所爲然
字體則同也

漢劉寬碑陰

右漢劉寬碑陰寬兩碑皆有陰此後碑陰也唐咸亨中
碑仆於野其裔孫周王記室參軍爽字元爽重爲建立

寬以中平二年卒據靈帝紀以光和七年十二月改元
中平以歷推之是歲甲子至明年當爲乙丑而爽書爲
甲子誤矣

漢尉氏令鄭君碑

右漢魏氏令鄭君碑云君字季宣聘君之孫而其名已
殘缺其他字畫時有可識處皆斷續不成文理畧可見
者年五十有七卒于中平二年而碑陰題尉氏故吏處
士人名知其爲尉氏令爾

漢趙相劉衡碑

右漢趙相劉衡碑云君諱衡字元宰濟南東平陵人也
厥先尙矣聖漢龍興其下殘缺又云爰啟冀土遷於岱

陰自康侯以來奕世不承又云勃海王帝之冢弟不遵
憲典君以特選爲郎中令以兄琅邪相憂卽日輕舉州
察茂才除修令遷張掖屬國都尉以病徵拜議郎遷缺
字東屬國都尉不行拜趙相在位三歲拜議郎年五十
有三以中平四年二月戊午卒其四月己酉葬其餘文
字完好者尙多按後漢書勃海王名悝桓帝弟也衡墓
與碑在今齊州歷城縣界中古平陵城傍余嘗親至墓
下觀此碑因模得之墓前有石獸制作甚工云

漢陳君碑

右漢陳君碑文字殘闕不完其畧可識者云君諱度字
妙高陳國相人案隸續云本是柘人陳國有柘縣趙氏誤認柘作相又云武王克

商封先代之後以元女大姬配胡公至厲公生公子完
奔齊其後斷續不復成文而最後題中平四年九月二
十日己丑立云

漢陳仲弓碑

右漢陳仲弓碑其額題云漢文範先生陳仲弓之碑碑
文字已漫滅蔡邕字畫見于今者絕少故雖漫滅之餘
尤爲可惜以校集本不同者已數字惜其不完也按邕
集仲弓三碑皆邕撰其一碑云中平三年秋八月丙子
卒而三碑皆云春秋八十有二後漢書仲弓傳以爲中
平四年年八十四卒於家者疑傳誤

漢陳仲弓碑陰

右陳仲弓碑陰故吏姓名多已剝缺蔡邕小字八分惟
此與石經遺字爾石經字畫謹嚴而此碑陰尤放逸可
愛

漢陳仲弓壇碑

右漢陳仲弓壇碑其額題故太邱長潁川陳君壇其他
文字摩滅不可盡識按蔡邕集有仲弓三碑以集本校
之此碑非邕撰者然字畫亦奇偉惜其殘缺不完也

漢圉令趙君碑

右漢圉令趙君碑其額題漢故圉令趙君之碑而最後
題初平元年十二月二十八日立碑已殘缺名字皆不
可考所可見者有云郡仍署五官掾功曹州辟從事司

徒楊公辟遷園令播德二城風曜穆清被疾去官年六十有八以中平五年冬十一月卒後有銘詩特完好其辭云天實高惟聖同戲我君羨其縱體宏仁蹈中庸所臨歷有休功追景行亦難雙刊金石示萬邦其辭頗爾雅故錄之

漢周公禮殿記

右漢周公禮殿記者今成都府學有漢時所建舊屋柱皆正方上狹下闊此記在柱上刻之靈帝初平五年立距今蓋千年矣而字畫完好可讀當時石刻在者已往往摩滅此記託於屋楹乃與金石爭壽亦異矣記有云甲午年故府梓潼文君增造吏舍二百餘間按華陽國志有文參字子奇梓潼人平帝用爲益州太守不從王莽公孫述光武嘉之疑此記所載卽其人也蓋光武建武十年歲次甲午云

漢巴郡太守樊君碑

右漢巴郡太守樊君碑云君諱敏字昇達肇祖宓戲遺苗后稷爲堯種樹舍潛於岐天顧亶甫乃萌昌發周室衰微霸佐匡弼晉爲韓魏魯分爲揚充曜封邑厥土河東楚漢之際或居于楚或集于梁君續其緒華南西壘又云總角好學治嚴氏經貫穿道度無文不覩於是國君備禮招請濯冕題冠傑立忠蹇有夷史之直卓密之風鄉黨見歸察孝除郎永昌長史遷蕩渠令大將軍辟

光和之末京師擾攘雄狐綏綏冠履同囊投核長驅案投

核二字從葉本即投劾也謝畢志枕邱國復重察辭病

不就再奉朝聘七辟外臺常為治中諸部從事又云季

世不祥米巫殍瘡案舊本並作姦狡竝起諂附者眾案

本詔君執一心賴無汚恥復辟司徒道隔不往牧伯劉

公表授巴郡以助義都尉養疾閭里又行褒義校尉年

八十有四歲在汴治紀驗期臻奄忽藏形其後有銘最

後題建安十年二月上旬造案日錄作三月金石他漢

碑類多剝缺而此碑獨首尾完好故載其大畧於此所

謂米巫凶虐者謂張角也案何氏焯云此謂張魯爾

漢綏民校尉熊君碑

右漢熊君碑其名字皆殘缺案集古錄云名喬隸釋云

喬字漢舉喬上闕一字其額題漢故綏民校尉騎都尉

桂陽曲紅灌陽長熊君之碑初余得桂陽太守周君碑

陰注水經注以為曲江漢時本名曲紅今此碑及額亦

皆作紅乃知酈道元為有據也

漢宗資墓天祿辟邪字

右漢天祿辟邪字在南陽宗資墓前石獸膊上歐陽公

集古錄按黨錮傳云資祖均自有傳見章懷今後漢書

有宋均傳云南陽安眾人而無宗均傳疑黨錮傳轉寫

宋為宗爾蜀志有宗預南陽安眾人豈安眾黨漢時有

宗宋二族而字與音皆相近遂致訛謬邪此說非是余

按後漢書均族子意傳云意孫俱靈帝時爲司空而靈
帝紀建甯四年書太常宗俱爲司空注云俱字伯儷南
陽安衆人嘉平二年書司空宗俱薨又姓苑載南陽安
衆宗氏云後漢五官中郎將伯子司隸校尉河內太
守均均族兄遼東太守京京子司隸校尉意意孫司空
俱元和姓纂所書亦同則均姓爲宗無可疑者當章懷
太子爲注及林寶撰姓纂時尙未差謬至後來始轉寫
爲宋爾余旣援據詳審遂於家藏後漢書均列傳用此
說改定云

漢司空宗俱碑

右漢司空宗俱碑云公諱俱字伯儷南陽安衆人也而
其額題漢故司空宗公之碑按後漢書宋均傳均族子
意意孫俱靈帝時爲司空余嘗得宗資墓前石獸膊上
刻字因以後漢帝紀及姓苑姓纂等諸書參考以謂自
均而下其姓皆當作宗而列傳轉寫爲宋誤也後得此
碑益知前言之不謬碑已殘缺不成文理而官秩姓名
鄉里特完好可考故詳著之

漢馮使君墓闕銘

右漢馮使君墓闕銘云故尙書侍郎河南京令豫州幽
州刺史馮使君神道按後漢王馮緄傳緄父煥安帝時
爲幽州刺史而緄碑亦云幽州君之元子此時在宕渠
緄墓前雙石闕上知其爲煥也

漢高陽令楊君碑陰

右漢高陽令楊君碑陰歐陽公集古錄云余家集錄得楊震墓域中漢碑四震及沛相繁陽高陽令碑并得碑陰題名然得時參錯不知爲何碑之陰也集古所有余盡得之又各以碑陰附于碑後其曰懷陵園令蔣禧字武仲者沛相碑陰也其曰故吏故民故功曹史故門下佐者繁陽令碑陰也其曰右後公門生右沛君門生者高陽令碑陰也

漢浚儀令衡立碑

右漢浚儀令衡立碑云君諱立字元節其先出自伊尹而其銘曰於穆從事歐陽公集古錄號爲元節碑且云疑其姓伊而爲從事也今碑首尙完題云浚儀令衡君之碑蓋漢時石刻其官爵姓氏旣載於額則其下不復更著苟文已殘缺又不見其額則遂難考究矣立與衛尉卿衡方墓皆在今鄆州中都方碑亦云其先伊尹號稱阿衡因以氏焉

漢光祿勳劉曜碑

右漢光祿勳劉曜碑集古錄云君諱曜字季尼年七十三其餘爵里官闕卒葬歲月皆不可見今此碑雖殘闕然尙有可考慮蓋孝文之裔又嘗爲太官令郎中居延都尉太宗正衛尉遂爲光祿勳至于卒葬年月則斷續不可考矣

金石錄卷十八終

金石錄卷十九

槐廬叢書

宋東武趙明誠德父編著

吳縣朱記榮校刊

跋尾九

漢

漢張侯殘碑

漢荊州從事苑鎮碑

漢趙相離府君碑

漢逢府君墓石柱篆文

漢永樂少府賈君闕銘

漢酸棗令劉熊碑

漢臨朐長仲君碑

漢蜀郡太守任君神碑

漢蜀郡屬國都尉王君神道

漢司空殘碑

漢益州太守楊宗墓闕銘

漢益州刺史薛君巴郡太守劉君碑

漢巴郡太守張君碑

漢南陽太守秦君碑額

漢河南尹蘇府君碑額

漢禹廟碑

漢禹廟碑陰

漢司空掾陳君碑陰

漢武氏石室畫像

戚伯著碑

四皓神位刻石

相府小史夏堪碑

郭先生碑

漢張侯殘碑

右漢張侯殘碑張侯者子房也碑已斷裂摩滅不可次敘獨其額尙完題漢故張侯之碑在今彭城古留城子房廟中驗其字畫蓋東漢時所立樂史寰宇記陳留縣有張良墓引城冢記云張良封陳留侯食邑小黃一萬戶漢爲良築城因名張良城今陳留有子房廟廟貌甚

盛余按西漢書地理志注畱屬陳故稱陳畱宋亦有畱
彭城畱是也子房傳曰始臣起下邳與上會畱城願封
畱足矣下邳與彭城相近而此碑乃漢人所立寔在彭
城然則子房所封非陳畱明矣城冢記誕妄蓋不足信
也

漢荊州從事苑鎮碑

右漢苑鎮碑其畧云漢故荊州從事苑君諱鎮字仲弓
南陽人也其先出自苑柏何爲晉樂正世掌朝禮之制
案別本無禮之二字又云有苑子園寔能掌陰陽之理君卽其胄
也按姓氏書皆云苑氏出於左傳所載齊大夫苑何忌
之後今此碑所謂苑柏何與子園左傳國語皆無其人

故錄之以俟知者

漢趙相離府君碑

右漢趙相離府君碑其前歷敘家世官爵而所述離君
事甚畧云府君名勸孝廉成臯令趙國相又云在官五
載莅政清平有甘棠之化年四十五卒于官故吏民漢
中太守鄆某等其名殘缺慕戀恩德刊石稱頌焉又有闕
銘題漢故趙國相離府君之闕云

漢逢府君墓石柱篆文

右漢逢府君墓石柱篆文云漢故博士趙傳逢府君神
道唐李利涉編古命氏北海逢氏有名絲字子繡者爲
漢趙王傅其孫萌不仕王莽蓋前漢人今逢君北海人

又爲趙王傅疑其是也而濰州圖經北海縣有逢汾墓云汾好學以德義聞徵爲博士趙王傅卒門人執衰經者數百葬於寒亭南四里今此篆文既不載其名皆莫可考然圖經所載逢君事首尾甚詳不知何以知其名汾必別有所據又疑絲與汾兩人前後皆嘗爲趙王傅未可知也故并載之以俟知者

漢永樂少府賈君闕銘

右漢永樂少府賈君闕銘按漢書桓帝母孝崇優皇后居永樂宮和平元年詔置太僕少府如長樂故事其後靈帝母孝仁董皇后亦居是宮歐陽公集古錄引章懷太子注云漢官儀長樂少府以宦者爲之則賈君蓋亦

宦者也余以漢史及石刻考之當時三公如陳球劉寬皆嘗爲此官非獨一人蓋自西漢以來太后皇后官屬如大長秋之類皆參用士人然則漢官儀以爲止用宦者爲之蓋其闕漏而集古錄遂以賈君爲宦者亦未必然也

漢酸棗合劉熊碑

右漢劉熊碑在酸棗縣云君諱熊字孟

下缺一字

按酈道元

注水經酸棗城內有漢縣令劉孟陽碑今據碑熊寔爲此縣令然則所缺一字當從水經爲陽也碑又云君光武皇帝之元孫廣陵王之孫俞鄉侯之季子也按後漢書光武之廣陵思王荆以譴死顯宗封其子元壽爲廣

陵侯又封元壽第三人皆爲鄉侯而李利涉編古命氏唐書宰相世系表皆云荆生俞鄉元侯平生彪襲封今據熊當爲彪之弟然則於光武乃其曾孫而曰元孫者疑碑誤

漢臨胸長仲君碑

右漢臨胸長仲君碑文字摩滅其麤可見者云君諱雄又云歷郡五官掾功曹史辟從事舉孝廉除郎中遷臨胸長而其額題故臨胸長仲君碑云

漢蜀郡太守任君神道

右漢蜀郡太守任君神道九字字畫壯偉然不著名字鄉里歲月莫詳其爲何人也

漢蜀郡屬國都尉王君神道

右漢王君神道在南陽云漢故蜀郡屬國都尉王君神道封陌桉鄴道元注水經涓水南道側有二石樓制作精妙題曰蜀郡太守姓王字子雅案雅謝本作雅稚葉本作雄南陽西鄂人有三女無男而家累千金父歿當葬三女各出錢五伯萬一女築墓二女建樓今此碑後有唐向城令張璿之撰孝女雙石樓記所書與水經注合惟水經誤以都尉爲太守爾璿之記天寶七載建別錄於後

漢司空殘碑

右漢司空殘碑政和乙未歲得于洛陽天津橋之故基首尾已不完所存四十五字字畫奇偉其詞有云命爾

司空余同爾輔據此乃嘗爲三公蓋當時顯人惜其不見名氏也碑陰有故吏題名百餘人尤完好筆法不減蔡邕石經云

漢益州太守楊宗墓闕銘

右漢楊宗墓闕銘在蜀中凡十六大字云漢故益州太守楊府君諱宗字德仲墓闕汝陽李長茂爲蜀使者罷歸以此本見遺長茂名公年東州善士以畫山水著稱者

漢益州刺史薛君巴郡太守劉君碑

右漢薛君劉君碑已斷裂不完惟存上一段而其額尙全題漢故益州刺史中山相薛君巴郡太守宗正卿成

平侯相劉君碑古無兩人共立一碑者惟見于此爾案續云碑有祭死者及薛劉征討字殆是紀述平寇之事趙氏誤以爲墓刻故云古爲兩人共立一碑者又額成平侯下本無相字蓋王子侯也

漢巴郡太守張君碑

右漢巴郡太守張君碑其前題巴郡太守都亭侯張府君功德敘云君諱訥案隸釋字子朗勃海南皮人也又

云炎漢龍興留侯維幹枝裔滋布竝極爵秩又云察孝廉案葉本從隸釋無廉字除郎中尙書侍郎遷甘陵宛句令親病

去官辟司空司徒府復辟太尉舉高第拜侍御史揚州寇賊陸梁作難五府表君中丞督捕又云丙子璽書封都亭侯碑無卒葬年日其後頗敘述政績而繫以銘詩

蓋巴郡太守德政碑爾按漢史自安順以來揚州寇賊屢發不知張君爲中丞督捕在何年也

漢南陽太守秦君碑額

右漢南陽太守秦君碑額文字已摩滅惟其額十大字尙完好故名字歲月皆莫可考按後漢書靈帝紀中平三年二月江夏兵趙慈反殺南陽太守秦頡或云此卽頡碑也然酈道元水經注載頡墓與碑皆在宜城此碑乃在南陽或是郡人所立德政頡爾案字原云碑在襄陽府宜城縣故牆集古錄以爲在南陽界中者河南南陽與湖廣襄陽接境故也此所疑非是

漢河南尹蘇府君碑額

右漢蘇府君碑額題漢故河南尹蘇府君碑今宣州太

守張叔夜嵇仲見寄云在許州道傍碑無文詞惟此十字其額爾按東漢時蘇氏最顯者惟蘇章嘗以河南尹徵不就其他無尹河南者意其爲章碑也然章扶風平陵人而碑乃在許昌未知是否

漢禹廟碑

右漢禹廟碑字畫淺細故摩滅尤甚其字跡歲月皆不可考畧可見者云皮氏長安定蘇而名字亦不能辨矣

漢禹廟碑陰

右漢禹廟碑陰自侯長汾陰趙遺子宣而下凡數十人姓名官爵具存又有故督郵曹史縣功曹鄉部吏柏昱等人名最後有龍門復民三十五戶人民在今龍門禹

廟殘碑之陰而集古錄云在閩鄉楊震墓側又云楊氏子孫當時皆葬閩鄉碑碣往往摩滅此不知爲誰碑者蓋誤也

漢司空掾陳君碑額

右漢司空掾陳君碑額碑已殘缺不可辨惟其首八大字尙完字畫奇偉在潁川陳太邱墓側核後漢書太邱傳載二子紀湛紀爲大鴻臚湛不著其爲何官惟劉孝標注世說引海內先賢傳曰湛字季方寔少子也司空掾公車徵不就蚤卒然則斯碑豈非陳湛碑乎

案隸續

云此蔡

中郎所作太邱第三碑也碑中自有太邱姓名後漢書陳寔傳父子竝著高名每宰府辟召常同時旌命恐其父子皆嘗以司空掾召也趙氏不能認碑故誤指爲湛耳

漢武氏石室畫像

右漢武氏石室畫像五卷武氏有數墓皆在今濟州任城縣墓前有石室四壁刻古聖賢畫像小字八分書題記姓名往往爲贊於其上文詞古雅字畫遒勁可喜故盡錄之以資博覽

戚伯著碑

右戚伯著碑首尾摩滅其畧可見者有云充列王室遇謗于呂委位捐爵而其額題周末嗣戚氏襲以興勃海君元孫伯著之碑知其姓戚以文詞字畫驗之疑東漢中葉以前人蓋當時石刻見於今者多類此所謂充列王室遇謗于呂者戚夫人也

四皓神位刻石

右四皓神位神胙几刻石四在惠帝陵傍驗其字畫蓋東漢時書按顏師古匡謬正俗引圈稱陳畱風俗傳自序云圈公之後圈公為秦博士避地商山漢祖聘之不就惠太子即位以圈公為司徒自圈公至稱十一世按班固述四皓但有園公非圈公也云當秦之時避地入商洛深山則不為博士明矣又漢初不置司徒安得以圈公為之乎稱之說實為鄙野余嘗疑稱著書自述其世系不應妄誕如此及得四皓刻石見其所書亦為圈公乃知稱所述果非臆說蓋當時所傳如此爾至謂圈公為秦博士及惠帝時拜司徒者疑無所據

相府小史夏堪碑

右相府小史夏堪碑云夏堪字叔德帝禹之精苗零陵太守之根嗣也後有銘銘三字語頗古其卒葬年月殘缺字雖不工然漢碑也其曰精苗根嗣漢末人為文喜造語多類此

郭先生碑

右郭先生碑集古錄以為漢碑核後魏酈道元注水經具載此碑云碑無年號不知何代人然則歐陽公何所據遂以為漢人乎余以字畫驗之疑魏晉時人所為既無歲月可考姑附於漢碑之次云

案郭先生名輔隸釋云碑有兩昭字晉人所諱疑此是魏刻

金石錄卷十九終

金石錄卷二十

槐廬叢書

宋東武趙明誠德父編著

吳縣朱記榮校刊

跋尾十

魏 吳 晉 偽漢 偽趙

魏大饗碑

唐重立大饗碑附

魏孔子廟碑

魏范式碑

魏太僕荀君碑

魏南郡太守卞統碑

晉南鄉太守司馬整碑頌

晉南鄉郡建國碑

魏大長秋游君碑

晉咸甯
中建

魏游君碑陰

吳禪國山碑

吳天璽元年斷碑

晉右將軍鄭烈碑

晉太公碑

晉雲南太守碑

晉護羌校尉彭祈碑

晉彭祈碑陰

晉光祿勳向凱碑

晉鴻臚成公重墓刻

偽漢司徒劉雄碑

鄧艾碑

與下兩碑
皆西晉時立

金鄉長薛君碑頌

張平子碑

造浮圖澄造釋伽像碑

趙橫山李君神碑

趙西門豹祠殿基記

晉樂毅論

學生題名

宋武帝檄譙縱文

魏大饗碑

右魏大饗碑按魏志文帝以建安二十五年嗣位爲丞相魏王改元延康夏六月南征秋七月甲午軍次于譙大饗六軍及譙父老今以碑考之乃八月辛未蓋魏志誤也是時不爲丞相漢獻帝猶在位雖政去王室已久然操之死纔數月爾不軍次舊里初無念親之心乃與羣臣百姓置酒高會大設伎樂而臣下又相與伐石勒辭夸耀功德更以夏啟周成漢高祖光武爲比豈不可笑也哉

唐重立大饗碑

附

右唐重立大饗碑大中五年亳州刺史李暨以舊文剝缺再刻于石舊碑旣斷續不可盡識而此碑特完好故附於其次俾覽者詳焉魏之事跡雖無足取而其文詞工妙亦不可廢也

魏孔子廟碑

右魏孔子廟碑按魏志文帝以黃初二年正月下詔以議郎孔羨爲宗聖侯奉孔子之祀及令魯郡脩起舊廟今以碑考之乃黃初元年又詔語時時小異亦當以碑爲正

范式碑

右范式碑法書要錄云蔡邕書今以碑考之乃魏青龍三年立非邕書也

魏太僕荀君碑

右魏太僕荀君碑其題額爲故太僕西楊亭成侯荀府君之碑碑已殘缺其可見者嘗爲齊相始平太守大將軍長史封西楊亭侯遂爲太僕春秋五十有一正始五年夏六月丙寅薨惟其名字鄉里摩滅不可考矣

魏南郡太守卞統碑

右魏南郡太守卞統碑在今曹州冤句縣所敘世次官闕甚簡又多殘缺其畧云君諱統字建業又云惟帝念庸命以南邦又云嘉平二年十一月己亥寢疾卒官而其首題魏故南郡太守卞府君之表按晉書卞壺傳濟陰冤句人祖統琅邪內史而元和姓纂亦云統爲晉琅邪內史今此碑殘缺處猶有琅邪字知其嘗爲此官而統以魏嘉平中卒姓纂以仕晉者誤也

晉南鄉太守司馬整頌

右晉南鄉太守司馬整頌云初仕魏拜郎中中郎議郎諫議大夫騎都尉給事中轉拜治書侍御史咸熙二年出臨鄙郡加宣威將軍又云謁者就郡拜君世子執節四讓推與兄嗣固辭懇誠泰伯三美君又加焉又云泰始三年十一月使者奉詔策命君南中郎將牧就統宛都按晉史整事跡附見安平獻王孚傳後云兄奕卒以整爲世子歷南中郎將封清泉侯早卒其餘官闕皆不載據史言兄奕卒以整爲世子而碑言推與兄嗣二說

不同當以碑爲正

晉南鄉郡建國碑

右晉南鄉郡建國碑已斷裂不完其額題南鄉郡建國之碑其大畧云嘉平五年漢水滔溢毀壞舊城又云正元二年城此其餘文字可識處大畧述遷郡事而銘文有與晉常存之語知其爲晉碑也按晉書地理志建安十三年魏武帝盡得荊州之地分南陽縣西界立南鄉郡及晉武平吳太康中改南鄉爲順陽而不載遷郡事此碑蓋太康以前立故仍稱南鄉也碑有云河內司馬府君者整也嘗守是郡自有碑此碑旣無建立年月因附於整碑之次焉

魏大長秋游君碑

晉咸甯
中建

右大長秋游君碑云君諱述字庶祖按元和姓纂云魏河南尹游述始居廣平六代孫後魏尙書明根生僕射肇今碑亦云述廣平人惟姓纂云述爲河南尹以碑考之蓋未嘗爲此官又按後漢書百官志大長秋承秦將行宦者景帝時更名大長秋或用士人中興嘗用宦者述嘗爲宛句長尙書郎左丞元城令治書侍御史南安北海安平東郡太守符節令遂爲大長秋皆非宦者之職然則魏制蓋亦參用士人矣

魏游君碑陰

右游君碑陰按王莽嘗下令禁二名故當時士人皆以

一字爲名東漢時尚爾今此碑陰所記凡二百五十三人亦無一人二名者碑晉咸甯中建距莽時二百年矣而士大夫猶遵莽之令不變何哉

吳禪國山碑

右吳禪國山碑其前敘孫皓卽位以後郡國祥瑞凡千餘言其後云乃以涪灘之歲欽若昊天月正革元郊天祭地紀號天璽又云丞相沆太尉璆大司徒燮大司空朝等以爲今衆瑞畢至三表納貢案三乃古四字雲麓漫抄作四表葉本作三誤失一筆爾九垓八埏罔不被澤率按典繇宜先行禪禮紀勒天命遂於吳興國山之陰告祭刊石以對揚乾命廣報坤德按皓以丙申歲改元天璽碑言涪灘之歲是也

皓淫虐無道人神憤疾而羣臣方稱述符瑞讚頌功德蓋刻石後四年遂爲晉所俘矣

吳天璽元年斷碑

右吳天璽元年斷碑其前云上天帝言又云帝曰大吳一萬方又云天發神讖文天璽元年七月己酉朔又云天讖廣多不解解者十一字嗚呼其言可謂妖矣據吳志天璽元年秋八月鄱陽言歷陽山石理成字凡二十明年改元大赦以協石文今此碑乃在金陵驗其文與吳志所載亦異莫可考究孫皓在位凡八改元而六以符瑞然竟不能保其國蓋人事不脩而假託神怪以矯誣天命其不終宜矣

晉右將軍鄭烈碑

右晉鄭烈碑云君諱烈字休林又云曾祖先生皇祖徵君顯考將作大匠寔有茂德載在國策烈晉史無傳以碑考之嘗為文帝參佐武帝時仕為兗州刺史封東莞男以疾徵拜議郎卒于太康二年追贈右軍將軍諡曰僖侯云案隸續云題額晉故右軍將軍平莞僖侯鄭府君之碑平字下一字額已損而銘辭亦微缺僅存莞字趙氏以為東莞則誤也晉縣亦無平莞非鄉名即亭名也

晉太公碑

右晉太公碑其畧云太公望者此縣人大晉受命四海一統太康二年縣之西偏有盜發冢而得竹策之書書藏之年當秦坑儒之前八十六歲今以晉書武帝紀考

之云咸甯五年汲郡人不準掘魏襄王冢得竹簡小篆古書十餘萬言藏于祕府與此碑年月不同碑當時所立又荀勗校穆天子傳其敘亦云太康二年與碑合可以正晉史之誤其曰小篆書亦謬也且其書既在秦坑儒八十六歲之前是時安得有小篆乎碑又云其周志曰文王夢天帝服元禳禳字字書所無以立于合狐之津帝曰昌賜汝望文王再拜稽首太公于後亦再拜稽首文王夢之之夜太公夢之亦然其後文王見太公而計之曰而名為望乎答曰惟為望案惟疑即唯字應辭也文王曰吾如有所見於汝太公言其年月與其日且盡道其言臣此以得見也文王曰有之有之遂與之歸以為卿士而史記

金石錄卷二十一
太公世家曰西伯將出獵卜之云云于是西伯獵果遇
太公于渭之陽與語大說曰自吾太公望子久矣故號
之曰太公望載與俱歸二說殊不合而王逸注楚詞亦
載文王夢太公事與碑所書畧同方逸爲注時此書未
出逸必別有所據碑又云其紀年曰康王六年齊太公
望卒參考年數蓋壽一百一十餘歲而史記亦不載按
前世所傳汲冢諸書獨有紀年穆天子傳師春等不載
所謂周志者不知爲何書而杜預左氏傳後敘云汲冢
書凡七十五卷皆藏祕府預親見之以此知不特十餘
萬言史之所記蓋不能盡其亾逸見于今者絕少也太
公碑汲縣合盧無忌立後題太康十年三月云

晉雲南太守碑

右晉雲南太守碑文字殘缺其姓氏名字鄉里皆不可
考畧可見者嘗爲尙書令史察孝廉除郎中遷武陽令
從龍驤將軍王濬征討遷雲南太守年五十有七卒最
後題太熙元年三月上旬造案葉本同日錄作三月謝
本注本作正月書畫譜亦
是正 太熙武帝年號也

晉護羌校尉彭祈碑

右晉彭祈碑云君諱祈字子元隴西襄武人也其先出
自顓頊有陸終之裔子太彭實主夏盟則其後也又云
歷郡右職州別駕從事于時庸蜀未殄侵擾王略洮西
之戰因敗運奇元帥獲安剋厭彊虜列上功狀除舍人

還參本軍事除涼州護軍河右未清戎寇鼎沸謀謨神
畧簡在帝心遷西郡太守至官未久復臨酒泉遠夷望
風禱負歸命白山丁令率服賓貢敦煌合狐豐拒違王
度淵泉之陳兵不血刃母老弟亾辭職去官聖上仁慈
聽君所求轉畧陽太守近家祿養案舊本作洛陽非也略陽與隴西相近今
定從遂罹大艱侍喪還家服紀終始有詔以軍州始分
葉本河右未清豺狼肆虐授君節蓋除護羌校尉統攝涼土
前後軍功應封七侯勞謙退讓陰德不伐年未知命以
太康十年三月癸酉薨天子愍悼遣使者監護喪事策
曰君秉心公亮所任有方不幸殞歿朕甚痛惜故孝廉
參護羌軍事酒泉馬朔故吏郎中棊母番主簿郭曉良
吏夏侯俊等追思洪烈感想哀嗟乃刊石勒銘焉西晉
石刻見於今者絕少又多殘缺此碑文字完好可喜乃
錄其終始事跡於此

晉彭祈碑陰

右晉彭祈碑陰題名者凡三百十二人有故孝廉計掾
計史良吏廉吏計佐主簿領校錄事中部督郵西部督
郵軍議從事和戎從事記室督軍謀從事錄事史戶曹
史賊曹史金曹史田曹史倉曹史鎧曹史兵曹史客曹
史記室史節史車曹史水部都督中部都督功曹典事
武猛從事舍人蜀渠都水行中郎勸農西部勸農東
都水蜀渠平水門下賊曹門下議生錄事金曹掾兵曹

掾作部史法曹史參戰騎都步督散督門下書佐弓馬
從事監牧史戟史金曹典事武猛史門下通事門下小
史凡一官多者十人少者不減數人其餘稱故吏無官
號者百六十餘人當時州郡官屬其濫如是蓋自漢以
來太守皆自得署置僚佐彭君爲邊郡守故其所辟尤
衆今盡錄其名號以見一時之制焉

晉光祿勳向凱碑

右晉向凱碑云君諱凱字士伯河內山陽人也其後歷
敘官闕甚詳其最顯者嘗爲中書侍郎尚書吏部郎給
事黃門侍郎賜爵關中侯廣平太守散騎常侍遊擊將
軍北中郎軍司兗州刺史中郎將後云累遷河南尹春
秋六十有八元庸九年四月甲子薨追贈光祿勳據此
乃當世顯人而晉史無傳故其事跡莫得而考蓋君子
所賴以傳者非爵位也顧所立何如爾自古老死邱壑
而名稱顯著者甚衆雖在高位而功烈不見于當時聲
跡無聞於後世者亦豈可勝數哉

晉鴻臚成公重墓刻

右晉成公重墓刻云永甯二年四月辛巳朔十五日乙
未守鴻臚關中侯成公重魏夫人之靈柩前世以永甯
紀年者三漢安帝晉惠帝僞趙石祇按三國志建安三
十年曹操始置關中侯十七級安帝時猶未有此號而
石祇永甯無二年然則重蓋惠帝時人也晉史有成公

金石錄卷二十一
簡成公綏皆東郡白馬人

僞漢司徒劉雄碑

右僞漢劉雄碑其額題漢故使持節侍中太宰司徒公
右部魏成獻王之碑碑云公諱雄字元英高皇帝之胄
孝宣帝元孫值王莽篡竊遠遁邊朔爲外國所推遂號
單于累葉相承家雲中因以爲桑梓焉雄劉元海弟也
晉書載紀元海本匈奴人冒頓之後漢高祖以宗女妻
冒頓約爲兄弟故其子孫遂冒姓劉氏今此碑直云出
自宣帝豈元海初起假此以惑眾乎碑後題嘉平五年
歲在乙亥二月六日建按宋莒公紀年通譜劉聰以晉
懷帝永嘉四年卽僞位改元光興明年改元嘉平嘉平
四年改元則嘉平豈復更有五年蓋載紀初不編年故
于改元歲月難考此碑當時所立不應差謬乃通譜誤
之也

鄧艾碑

與下兩碑皆西晉時立

右鄧艾碑其額題魏使持節征西將軍方城侯鄧公之
碑碑無建立年月以詞考之蓋晉初立按魏晉史其名
皆爲艾而碑作艾古艾又通爲俊又艾又安之字

案謝

本作古文艾別本作古艾又皆非是此謂疑艾名其音
艾古通爲俊艾艾艾安之字耳今改正

如此而今人讀如蕭艾之字恐非是又按艾平蜀卽軍
中拜太尉而碑但題爲征西將軍者疑尋被禍未嘗受
命而艾始封方城侯後改封鄧侯碑尙云方城侯何哉

金鄉長薛君頌

右薛君頌在今濟州金鄉縣其額題故金鄉長汝南薛君之頌云君諱詣案葉本詣作言書畫譜作頌疑誤字公謀其他文字皆完好驗其詞蓋縣長德政頌爾雖無建立年月而有吳寇未下缺一字耀威海隅之語知其為晉碑也

張平子碑

右張平子碑晉南陽相夏侯湛撰識緯之說興於西漢之末而爛漫於東漢之世雖一時名儒皆從而惑焉獨平子奮然闢之甚力余嘗歎以為如平子可謂豪傑之士不為流俗所移者今湛為此碑乃云金匱玉版之奧識契圖緯之文罔不該羅其情可謂不知平子矣

趙浮圖澄造釋伽像碑

右趙浮圖澄造釋伽像碑唐封演聞見記云內邱縣西古中邱城寺有碑後趙石勒光初五年立碑云太和上竺浮圖澄者天竺大國附庸小國王之元子也本姓濕此碑即演所見其說皆同按晉書藝術傳澄本姓帛氏今碑作濕碑當時所立宜得其真又史作佛圖碑作浮圖二字音相近爾惟光初乃劉曜年號而以為石勒時蓋演誤也

趙橫山李君神碑

右趙橫山李君神碑題建武六年歲在庚子三月己亥二十一日癸丑按晉書成帝紀石虎以咸和九年自立

爲趙天王而載記云咸康元年僭稱居攝趙天王據帝紀則建武六年歲在己亥據載記則歲在庚子宋莒公紀年通譜獨以本紀爲據今此碑及西門豹祠殿基記竝六年建皆云歲在庚子以此知帝紀之失非二碑則晉紀與載記得失不復可考矣

趙西門豹祠殿基記

右趙西門豹祠殿基記云趙建武六年歲在庚子秋八月庚寅造西門祠殿基又云巧工司馬臣張由監作吏臣杜波馬孫殿中司馬臣王基殿中都尉臣潘倪侍御史騎都尉臣劉誼左校令臣趙升殿中校尉臣顏零等監其下刻物像甚多如土長強良碩章舒悽雀之類其名頗異近歲臨淄縣人耕地得巧工司馬印遍尋史傳皆無此官名不知爲何代物今乃見于此碑云

晉樂毅論

右晉樂毅論石本舊藏高紳學士家集古錄云紳死其子弟以石質錢於富人而富人家失火遂焚其石者非也元祐間余侍親官徐州時故郎官趙竦被旨開呂梁洪挈此石隨行已斷裂用木爲匣貯之竦尤珍惜親舊有求墨本者必手模以遺之竦歿今遂不知所在

學生題名


右學生題名歐陽公集古錄以爲漢文翁學生余獨疑其非是蓋以爲西漢時立則字畫不類以爲東漢則東

漢絕無二名者今此碑二名者凡數人又唐顏有意所書益州學館廟堂記載漢以來石刻皆備獨無此題名使其爲文翁學生決不冝漏落余以字畫驗之疑其爲晉以後人所立然初無所據未敢遂以爲然其後以地里書參考乃決知其非文翁學生也題名有幹江陽趙嵩典學從事史甯蜀常仲舒憲道左生遂甯董朗元明左生晉原陽容宗長按晉書志江陽郡蜀劉備置甯蜀遂甯晉原竝桓溫平蜀後蜀四郡東西兩漢時皆未自然則此碑爲東晉以後人所立無疑矣

宋武帝檄譙縱文

右宋武帝檄譙縱文按顏有意書成都學館廟堂記云

石室北壁有晉義熙九年刺史朱齡石勒宋高祖檄譙縱文其字摩滅不可備識學館記唐初立距今又數百年宜其摩滅愈難識矣然其歲月官爵猶畧可辨云



金石錄卷二十一終

金石錄卷二十一

槐廬叢書

宋東武趙明誠德父編著

吳縣朱記榮校刊

跋尾十一

後魏 東魏 梁

大代華嶽碑

後魏孔宣尼廟記

後魏孝文帝比干文

後魏比干碑陰

後魏大鴻臚卿鄭允伯碑

後魏御射碑

後魏太尉于烈碑

後魏鄭羲碑

後魏鄭羲上碑

後魏車騎大將軍邢巒碑

後魏叱間神寶脩關城銘

後魏安東將軍孫公墓誌

後魏定州刺史崔亮頌

後魏贈司空元暉碑

後魏范陽王碑

後魏贊拔岳碑

東魏膠州刺史祖淮碑

東魏大覺寺碑

東魏大覺寺碑陰

東魏高翻碑

東魏張烈碑

東魏賈思同碑

東魏魏蘭根碑

後魏化政寺石窟銘

梁重立羊祜碑

東魏敬君像頌

大代華嶽碑

右大代華嶽碑歐陽公集古錄云魏自道武天興元年

議定國號羣臣欲稱代而道武不許乃仍稱魏自是之

跋尾十一 宋氏槐廬校刊

後無改國稱代之事今魏碑數數有之碑石當時所刻

不應妄但史失其事爾余按崔浩傳云方士初織案傳是祿

秦改代為萬年浩曰昔太祖道武皇帝應期受命開

拓洪業諸所制宜無不循古以始封代土後稱為魏故

代魏兼用猶彼殷商蓋當時國號雖稱為魏然猶不廢

始封故兼稱代爾此事亦見陽松玢談藪云案入代談藪陽松玢

後魏孔宣尼廟記

右後魏孔宣尼廟記在今懷州界中文詞頗古質可喜

云孔子欲北從趙鞅聞殺鳴犢遂復車而返案葉本及

其歿也晉人思之於太行嶺南為之立廟焉記太和元

年立其額又有延興四年太上皇帝祭孔子文者孝文

之父獻文帝也

後魏孝文弔比干文

右後魏孝文弔比干文其首已殘缺惟元載字可識其

下云歲御次乎闔茂望舒會于星紀十有四日日惟甲

申按爾雅云歲在戌曰闔茂又鄭康成注月令仲冬者

日月會於星紀後漢書孝文以太和十八年十一月甲

申經比干墓親為弔文樹碑而刊之是歲甲戌其說皆

合其未嘗改元而稱元載者孝文以是歲遷都洛陽蓋

以遷都之歲言之也

後魏比干碑陰

右比干碑陰盡紀侍從羣臣官爵姓名按後魏書官氏志邱穆陵氏後改爲穆氏今此碑自侍中邱目陵亮以下同姓者凡三人字皆作目而元和姓纂所書與此碑正同又碑自穆崇至亮皆姓邱目陵氏姓纂亦云後改爲穆而史但云姓穆者皆有闕誤案葉本有作其

後魏大鴻臚卿鄭允伯碑

右後魏鄭允伯碑元和姓纂載滎陽鄭氏云華生七子白麟小白叔夜洞林歸藏連山幼麟號七房鄭氏允伯小白子也按後漢書幼麟傳云父華生六子又云幼麟五兄長白麟次小白次洞林次叔夜次連山而無歸藏其次第亦不同又姓纂云小白名茂而史云幼麟名羲

案而史當作北史疑自白麟以降皆其字也據碑與姓纂皆云允伯仕至大鴻臚卿而史言少卿者誤也

後魏御射碑

右後魏御射碑在今懷州按北史及魏書宣武紀景明三年十月庚子帝躬御弧矢射遠及一百五十步羣臣勒銘於射所卽此碑也碑云惟魏定鼎遷中之十載又云皇上春秋一十有七據史及孝文帝比干文皆云太和十八年遷都洛陽至景明三年蓋九年矣而碑作十載恐誤又史云宣武以太和七年生景明三年案舊本作四年誤當作二十而碑言年一十有七則當以碑爲據然則宣武終於延昌四年蓋壽三十歲而史以爲壽三十三

金石錄卷二十一
四
者亦誤也余按禮記問天子國君之年對者皆不敢斥
言魯襄公送晉侯晉侯問公年季武子對曰會沙隨之
歲寡君以生是也今魏人乃直書其君之年於碑豈禮
也哉

後魏太尉于烈碑

右後魏太尉于烈碑云初以功臣子起家爲中散轉屯
田給事內都幢將遷左衛將軍而後魏書列傳云少拜
羽林中郎遷羽林中郎將以本官行秦雍二州事遷司
衛監以碑考之烈皆未嘗爲此官又其父洛拔爲黃龍
鎮都大將而曰和龍烈爲屯田給事而曰給納卒年六
十七而曰六十五者皆史之誤又按烈始封昌國子改

鉅鹿公

案烈祖栗碑嘗假封新安公後
賜爵新城男疑此亦假封也

又改洛陽侯進

封聊城縣開國子再進爲開國伯開國侯其卒追封爲
鉅鹿郡開國公蓋當時之制如此魏書官氏志不載皆
莫可考

後魏鄭羲碑

右後魏鄭羲碑魏史列傳與此碑皆云羲滎陽開封人
碑又云歸葬於滎陽石門東十三里三皇山之陽而碑
乃在今萊州南山上磨厓刻之蓋道昭嘗爲光州刺史
卽今萊州也故刻其父碑於茲山余守自州嘗與僚屬
登山徘徊碑下久之傳云羲卒尙書奏謚曰宣詔以羲
雖宿有文業而治闕廉清改謚爲文靈今碑首題云滎

陽鄭文公之碑其末又云加謚爲文傳載賜謚詔書甚詳不應差誤而碑當時所立必不敢諱其一字皆莫可知也已

後魏鄭義上碑

右鄭義上碑初予爲萊州得義碑於州之南山其末有云上碑在直南二十里天柱山之陽此下碑也因遣人訪求在膠水縣界中遂摹得之義之卒葬滎陽其子道昭永平中爲光州刺史爲其父磨厓石刻二碑焉按地理書後魏皇興四年分青州置光州領東萊郡隋文帝時罷郡仍改光州爲萊州云

後魏車騎大將軍邢巒碑

右後魏邢巒碑云巒字山賓而史作洪賓其爲梁州刺史碑云徵爲都官尙書而史作度支後改爲七兵尙書而史不載又巒爲崔亮所糾據碑言戎車旣班猶以在州之誣遭禁一期而史以謂元暉高肇爲巒申釋故得不坐者非也

後魏叱間神寶脩關城銘

案書畫譜作脩關城銘前目錄作造像記

右後魏叱間神寶脩關城銘題右將軍西中郎將叱間神寶銘又云維大魏神龜元年歲次戊午十一月壬午朔十日壬辰起工三十萬案謝本工作功脩治關城并作館第敬造三級浮圖按後魏書官氏志及元和姓纂有叱門氏後改爲門而無叱間氏蓋其闕漏也

後魏安東將軍孫公墓誌

右後魏孫公墓誌其名字鄉里年壽皆不載獨其末載贈官制書云故安東將軍銀青光祿大夫襄強縣開國男孫蔚知其名蔚又云歸葬於世邑武遂知其爲邑人也按後魏書儒林傳有孫惠蔚其所書事跡與志皆合傳云先單名蔚正始中侍講禁內夜論佛經有愜帝旨詔使加惠號蔚法師焉

後魏定州刺史崔亮頌

右後魏崔亮碑題云魏鎮北將軍定州刺史崔使君至化之頌蓋亮嘗爲定州旣去郡人立此碑頌德爾其間載亮所歷官甚詳與北史及後魏書列傳多合惟其自定州歸朝歷殿中都官吏部二尙書而傳但言自殿中遷吏部爾亮以正光二年卒而碑神龜三年建在亮卒前故自爲侍中以後事碑皆不及載也

後魏贈司空元暉碑

右後魏元暉碑據後魏書列傳云暉鎮西將軍忠子而北史以爲忠弟德之子今以碑考之北史是也又碑云孝文時爲主客郎中而魏史言世宗卽位拜此官碑云神龜二年卒而史言元年卒者亦非是其餘遷拜次第時有不同不盡錄也

後魏范陽王碑

右後魏范陽王碑云王諱誨高祖孝文皇帝之孫太師

武穆王之子今世所傳後魏書北史孝文諸子列傳皆文字脫落不完惟孝明紀載孝昌二年封廣平王懷庶長子誨爲范陽王以此知其爲懷子據碑云懷諡武穆而傳作文穆者誤也誨仕至僕射爲尔朱兆所殺事見莊帝本紀

後魏賀拔岳碑

右後魏賀拔岳碑岳當時名將也北史及後魏書皆有傳初爲尔朱榮親將其後齊神武使侯莫陳悅害之尔朱榮凶殘狂悖蓋魏之莽卓也而碑乃以爲圖伊霍之舉豈不可笑也哉然魏收爲魏史受榮子文略之賂亦以榮比韓彭伊霍乃知貪鄙無知之徒世不乏人也按

莊帝諸書皆作孝莊而此碑獨作孝壯疑書碑者之誤

東魏膠州刺史祖淮碑

右東魏祖淮碑云君膠州平昌安邱人也六世祖逖又云其卒贈膠州刺史按後魏永安中分青州置膠州隋開皇五年改爲密州焉

東魏大覺寺碑

右東魏大覺寺碑在洛陽碑陰題韓毅書據北史毅魯郡人工正書神武用爲博士以教彭城景思王攸當時碑碣往往不著名氏毅以書知名故特自著之也然遺跡見於今者獨此碑爾

東魏大覺寺碑陰

右大覺寺碑陰題銀青光祿大夫臣韓毅隸書蓋今楷
字也庾肩吾曰隸書今之正書也張懷瓘六體書論亦
云隸書者程邈造字皆真正亦曰真書自唐以前皆謂
楷字爲隸至歐陽公集古錄誤以八分爲隸書自是舉
世凡漢時石刻皆自爲漢隸有一士人力主此論余嘗
出漢碑數本問之何者爲隸何者爲八分蓋自不能分
也因覽此碑毅自題爲隸書故聊誌之以祛來者之惑

東魏高翻碑

右東魏高翻碑翻齊獻武王歡叔父也魏書本傳云以
元象中追加贈諡碑後題建立歲月文字殘缺惟有魏
元字可辨又云歲次己未按東魏孝靖以元象二年十
一月改元興和是年歲次己未此碑蓋元象二年建立
也

東魏張烈碑

右東魏張烈碑在今青州界中文字摩滅以事考之蓋
張烈也按北史烈傳烈爲家誠千餘言臨終勅子姪不
聽求贈但勒家誠立碣而已卽此碑是也其卒葬年月
殘缺不可辨傳亦不載惟青州圖經稱卒於元象中云

東魏賈思同碑

右東魏賈思同碑思同與其兄思伯後魏書皆有傳云
青州益都人今其墓乃在壽光縣而思伯之碑亡矣

東魏魏蘭根碑

右東魏魏蘭根碑按北史列傳云蘭根起家北海王國侍郎而碑云起家奉朝請遷員外散騎侍郎碑云以在岐州之功封永興縣開國侯而史不載又史云天平初謝病以開府儀同歸本鄉武定三年薨而碑云薨於天平二年其卒也史云贈司空而碑作司徒皆當以碑爲正

後魏化正寺石窟銘

右後魏化正寺石窟銘北史及魏書有宦者抱疑傳云疑終於涇州刺史自言其先姓杞後避禍改焉今此碑題涇州刺史杞疑造疑後復改從其本姓爾

梁重立羊祜碑

右羊祜碑梁大同中以舊碑殘缺再書而刻之碑陰具載其事今附於次

東魏敬君像頌

右東魏敬君像頌敬君名曦顯雋從弟也碑云十世祖漢揚州刺史韶按後周書敬珍傳唐書宰相世系表皆云韶漢末爲揚州刺史與此碑所書同而姓苑與元和姓纂皆作歆疑轉寫之誤又據碑顯雋乃韶十世孫而姓纂以爲九世恐亦誤也

金石錄卷二十一終

金石錄卷二十二

槐廬叢書

宋東武趙明誠德父編著

吳縣朱記榮校刊

跋尾十二

後魏 北齊 後周 隋

後魏鎮東將軍劉乾碑

後魏汝南王碑

北齊造像記

北齊郁久閭業碑

後周延壽公碑頌

後周太學拓拔府君墓誌

北齊華陽公主碑

北齊天柱山銘

後周華嶽廟碑

後周河瀆碑

後周同州刺史普六如忠墓誌

北齊隴東王感孝頌

後周溫州刺史烏丸僧脩墓誌

北齊長樂王尉景碑

北齊馮翊王平等寺碑

北齊臨淮王像碑

北齊白長命碑

北齊大安樂寺碑

北齊司空趙起碑

北齊贈司空趙奉碑

北齊宜陽國太妃傅氏碑

北齊赫連子悅清德頌

隋興國寺碑陰

隋齊國太夫人楊氏墓誌

隋化善寺碑

隋願力寺舍利寶塔函銘

隋周羅睺墓誌

隋禹廟殘碑

隋黃門侍郎柳旦墓誌

隋尚書左僕射元壽碑

隋西林道場碑

後魏鎮東將軍劉乾碑

右後魏鎮東將軍劉乾碑云君諱乾字天自胡夷亂華典章文物掃地而盡至於名字書畫皆一出其私意而無復稽考可謂亂世矣若劉君者名乾字天豈不怪哉

案謝本後八字下亦有自字蓋前誤以自字屬上句故後復妄增耳

後魏汝南王碑

右後魏汝南王碑王名悅孝文子也尔朱榮之亂奔梁梁武厚遇之立為魏主後復歸北據後魏書列傳云出帝時為大司馬卒而帝紀與北史皆言為出帝所殺蓋

列傳之誤而此碑亦不書者諱也

北齊造像記

右北齊造像記云天保四年歲次己酉按齊文宣以東魏武定八年受禪改元天保是歲庚午至四年當為癸酉而此記誤書癸為己爾其字畫不工特以甲子差誤恐後來疑焉因錄於此

北齊郁久閭業碑

右北齊郁久閭業碑郁久閭其姓本出東胡見於北海者有後魏景穆恭皇后郁久閭氏云河東王毗之妹今魏書列傳但有閭毗又有閭大肥皆云蠕蠕人蓋同族也大毗道武時歸國尚華陰公主以此碑考之業乃大

肥之孫魏書於皇后傳云姓郁久間而於毗與大肥傳止言姓間毗於景穆皇后爲兄弟其姓不應有異使後嘗更姓史家亦當具載兼大肥之孫亦不當復用舊姓也蓋史之闕漏又碑云祖名大泥鵲起而史作大肥碑又云業茹茹國王步渾之元孫蠕蠕或稱茹茹見於前史爲魏書蠕蠕列傳自木骨間以來敘其世系甚詳無名步渾者亦莫知其爲何人也

後周延壽公碑頌

右後周延壽公碑頌云勳州刺史延壽郡開國公万紐于寔考之於史寔太師燕國公子謹子也謹後魏新安公子栗磾子洛拔之後余家有洛拔子烈碑述其世系

甚詳云遠祖之在幽州世有部落

案謝本作世首部落

陰山之北

有山號万紐于者公之奕葉居其原趾遂以爲姓暨高祖孝文皇帝時始賜姓爲于氏焉今此碑復稱万紐于者蓋後周時凡孝文賜姓者皆復改從舊云又姓纂及唐書宰相世系表皆云謹洛拔五世孫也以後魏及周書考之洛拔以太安四年卒年四十五謹以正光四年爲廣陽王元深長流參軍年三十一洛拔之卒距謹之爲參軍蓋六十四年矣洛拔旣早世不應後六十四年已有五世孫年三十一也以此知言謹爲洛拔五世孫者蓋未可信又周書稱謹祖名安定而唐書表作子安亦莫究其孰失也

後周太學生拓拔府君墓誌

右後周太學生拓拔府君墓誌陳使周宏正撰云君諱吐度真魏昭成皇帝之後也夷虜以三字爲名者甚衆拓拔君爲書生尙仍舊俗何哉蓋自魏孝文帝惡夷虜姓氏盡易之至後周一切復改從舊故當時士人名字亦皆虜語無足怪也

北齊華陽公主碑

右北齊華陽公主碑云公主諱秀豔蓋魏孝文帝之孫廣平王懷之女北齊趙郡王叡之母也按北史叡列傳其前云母華山公主而其後乃作華陽今此碑及北齊書皆止言封華陽蓋北史誤也

北齊天柱山銘

右北齊天柱山銘在今萊州膠水縣初後魏永平中鄭道昭爲郡守名此山爲天柱刻銘其上至北齊天統元年其子述祖繼守此邦復刻銘焉按後魏書道昭之父義謚文靈而道昭所立義碑乃云謚爲文今此碑又云謚文貞皆莫可考

後周華嶽廟碑

右後周華嶽廟碑万紐于瑾撰趙文淵字德本書按後周書列傳有趙文深字德本蓋唐初史官避高祖諱故改淵爲深爾万紐于瑾者唐瑾也周文帝時賜姓宇文後以于瑾請與同姓更爲万紐于云

後周河瀆碑

右河瀆碑後周天和二年建內史大夫琅邪王褒字子淵造文趙興郡守趙文淵字德本奉勅書余嘗讀楊大年談苑云千字文題勅員外散騎侍郎周興嗣次韻勅字乃梁字傳寫誤爾當時帝王命令尙未稱勅至唐顯慶中始云不經鳳閣鸞臺不得稱勅勅之名始定於此按此碑及唐瑾撰華嶽廟碑皆文淵奉勅書後周距梁時未遠又隋薛道衡撰老子碑唐初虞世南撰孔子廟堂杜如晦碑歐陽詢書昭陵九成宮碑皆作奉勅如此類甚衆略舉一二要知不獨始於顯慶大年之論非也然則唐人所謂不經鳳閣鸞臺不謂之勅者蓋言命令當由廟堂出非謂勅之名始於此也然文淵奉勅書碑而自著其字何哉

後周同州刺史普六如忠墓誌

右普六如忠墓誌普六如者楊忠隋高祖父也後魏時賜姓以誌考傳其事皆合惟其爲都督涇幽雲顯鹽靈等六州諸軍事而傳以幽爲幽者蓋傳寫誤爾

北齊隴東王感孝頌

右北齊隴東王感孝頌隴東王者胡長仁也武平中爲齊州刺史道經平陰有古冢詢訪耆舊以爲郭巨之墓遂命僚佐刻此頌焉墓在今平陰縣東北官道側小山頂上隧道尙存惟塞其後而空其前與杜預所見邢山

上鄭大夫冢無異冢上有石室制作工巧其內鐫刻人物車馬似是後漢時人所爲余自青社如京師往還過之屢登其上按劉向孝子圖云郭巨河內溫人而酈道元注水經云平陰東北巫山之上石室世謂之孝子堂亦不指言何人之冢不知長仁何所據遂以爲巨墓乎

案頌有孝子堂之語故知卽水經所載也

後周溫州刺史烏丸僧修墓誌

右後周烏丸僧脩墓誌僧脩本姓王氏梁南城侯神念之子太尉僧辨之弟後歸周仕爲溫州刺史卒元和姓纂及唐史宰相世系表皆云神念父罔爲護烏丸校尉因號烏丸王氏今墓誌乃云僧脩歸周賜姓烏丸又諸書皆云神念謚壯而墓誌作莊唐表云僧脩生景孝而墓誌云名祥字景孝皆當以誌爲正

北齊長樂王尉景碑

右北齊長樂王尉景碑按北齊書景字士眞而碑云字副羽蓋傳之誤

北齊馮翊王平等寺碑

右北齊平等寺碑題太宰馮翊王定光像寶殿碑馮翊王者名潤齊神武子也碑云寺魏廣平王懷所立永平中造定光銅像一區高二丈九赤屬魏季像在寺外未果移入其後齊高祖過洛陽始遷像入寺至潤又增修殿宇焉據羊銜之洛陽伽藍記云孝昌三年十二月中

此像面有悲容兩目垂淚三日而止其後尔朱榮北海王尔朱兆入洛陽像皆悲泣如初每經神驗朝野惶懼其事甚異而此碑不載

案碑以軀爲區省文也以尺爲赤古字通用羊銜之舊本誤作

楊衍之

北齊臨淮王像碑

右北齊臨淮王像碑臨淮王者婁定遠也北齊書和士開傳定遠與趙郡王叡謀出土開爲兗州刺史未行士開納賂定遠得畱復出定遠爲青州刺史責叡以不臣之罪而殺之定遠歸士開所遺加以餘珍賂之乃免如史所書定遠可謂小人矣定遠本傳但云封臨淮郡王而不書其爲青州者闕也又定遠從弟叡旣附見定遠傳而於外戚傳又重出南北朝諸史猥并類如此可笑也

北齊白長命碑

右北齊白長命碑云公字長命而其名已殘缺長命白建之父也北齊書及北史建傳皆云父名長命者蓋齊魏閒人多以字爲名爾

北齊大安樂寺碑

右北齊大安樂寺碑其額題廣業王大安樂寺碑廣業王者尉萇命之子破侯也碑云魏末離亂萇命嘗營護此寺其後破侯與其弟興敬復加營葺故立此碑按北史及北齊書有尉長命傳今碑乃作萇命又史云其卒

金石錄卷二十二
謚曰武壯而碑乃作武莊當以碑爲正破侯嘗仕爲中書令尚書左僕射尚書令錄尚書事封廣業王官甚顯而史無傳

案何氏焯云六朝碑中長與葺莊與壯多通用

北齊司空趙起碑

右北齊趙起碑按北齊書列傳云起天統二年除滄州刺史武平中卒於官今以碑考之起自滄州還闕除吏部尚書判外兵省事遷光祿大夫以本官兼尚書左僕射出行懷州事轉膠州刺史封南泉郡王乃卒史皆不書而云卒於滄州誤矣

北齊贈司空趙奉碑

右北齊趙奉碑奉彥深父也碑云諱奉字奉伯而北齊書及北史但云名奉伯而已碑又云父清河府君剖符東秦著績齊土久於其職遂卽家焉今爲平原貝邱人也而史乃云彥深高祖父難爲清河太守遂家清河清河後改爲平原二事不同皆當以碑爲正惟史以謂彥深本名隱避齊廟諱故以字行而碑直書爲隱何哉

北齊宜陽國太妃傅氏碑

右北齊宜陽國太妃傅氏碑其額題齊故女侍中宜陽國貞穆太妃傅氏碑碑云太妃諱華清河貝邱人也按北史後魏置女侍中視二品然本後宮嬪御之職今以宰相母爲之惟見於此傅氏趙彥深之母有賢操事載於史

北齊赫連子悅清德頌

右北齊赫連子悅清德頌據北史列傳子悅爲鄭州刺史郡人請爲文碑詔許之碑所載亦同而碑乃在今許昌者按隋書地理志潁川郡舊置潁州東魏改曰鄭州後周改曰許州又傳云子悅天保中爲揚州刺史而碑作陽州者按地理志東魏於宜陽置陽州後周改爲熊州云

隋興國寺碑陰

右隋興國寺碑陰丁道護書道護所書興國啟法兩寺碑皆在襄陽歐陽公嘗得啟法寺碑列於集古錄中而於太學官楊裒處見興國寺碑以不得入錄爲恨今碑陰又有襄州鎮副總管柳止戈以下十八人姓名字畫尤完好歐陽公所未見也蔡君謨題其後云在杭州日坐有客曰小說稱丁眞永草永固知名丁何人也余謂道護豈其人耶按法書要錄丁覘與知永同時人善隸書世稱丁眞永草非道護也

隋齊國太夫人楊氏墓誌

右隋齊國太夫人楊氏墓誌云夫人字季姜僕射高顛母也隋書顛傳云顛以母憂去職開皇二年伐陳詔顛節度諸軍據此顛之丁內艱蓋在開皇初今以墓誌考之楊氏之卒乃在十年傳稱顛旣貴其母嘗誠以遠禍後顛竟以危言爲煬帝所誅如其言可謂賢母矣嘗恨

不著其姓氏今乃見於此云

隋化善寺碑

右隋化善寺碑在徐州碑陰有郎餘令題記云隋尹武撰余元祐間侍親官彭門時爲兒童得此碑今三十餘年矣

隋願力寺舍利寶塔函銘

右隋願力寺舍利寶塔函銘仁壽三年相州刺史薛胄建唐劉禹錫集載僧靈澈詩有云經來白馬寺僧到赤烏年禹錫稱其工因讀此銘序亦以白馬之寺對赤烏之年乃知前人已以此語蓋隋唐間文體大率以偶儷爲工雖格力卑弱然用事親切時有可喜也

隋周羅睺墓誌

右隋周羅睺墓誌無書人姓名而歐陽率更在大業中所書姚辨墓誌云長壽碑與此碑字體正同蓋率更書也往時書學博士米芾善書尤精於鑒裁亦以余言爲然羅睺名將隋史有傳今以墓誌考之羅睺在陳自鍾離太守遷秦郡而史不載又史云開皇中自幽州刺史轉涇州母憂去職復起授幽州遼東之役徵爲水軍總管進爲上將軍而墓誌自幽州爲水軍總管進上將軍然後爲涇州其遷拜次第皆不同又史云拜東宮右虞侯率而墓誌爲左監門率史云轉右衛率而墓誌爲右監門武侯率史云自在武侯大將軍進授上將軍而墓

誌不載蓋未嘗拜此官也皆當以墓誌爲據

隋禹廟殘碑

右隋禹廟殘碑其文字摩滅十五六而其末隱隱可辨云會稽郡下缺史陵書筆法精妙不減歐虞按張懷瓘書斷云褚遂良嘗師史陵蓋當時名筆也今此碑摩滅而僅存世之藏書者皆未嘗有非余收錄之富則遂不復見於世矣

隋黃門侍郎柳旦墓誌

右隋柳旦墓誌考隋史列傳事跡皆同惟傳云攝判黃門侍郎而墓誌云檢校黃門侍郎小異爾又墓誌載旦六子燮則綽楷濬亨而元和姓纂與唐史宰相世系表皆云旦五子而闕其第五子濬亦當以墓誌爲是也

隋尙書左僕射元壽碑

右隋元壽碑虞世基撰歐陽詢書按隋史壽開皇中爲尙書主爵侍郎而碑云主爵郎碑云從晉王伐陳事兼揚州長史授行軍總管長史平陳遂爲揚州總管府長史遷尙書左丞而史但云自元帥府屬平陳入爲左丞爾又爲太常少卿時兼雍州司馬史亦不載其卒贈尙書左僕射光祿大夫封博平侯而史但云贈右僕射皆其闕誤史云壽在周封儀隴縣侯而碑作儀龍侯今按隋書地理志有儀隴縣屬巴西郡而無儀龍未知孰是

隋西林道場碑

右隋西林道場碑題太常博士歐陽詢撰而不著書人名氏余家藏隋姚辨墓誌元壽碑皆率更在大業中爲博士時所書與此碑字體絕不類知其非率更書也

金石錄卷二十二終

